

退思軒詩集

宣統辛亥夏
月 孫子武昌

退思軒詩集序

退思軒詩集爲長沙張文達公遺著前年志齋
詒書嘉興沈曾植屬爲點定刪存將付楚陶生
仿宋槧法刻以傳諸後世曾植謝不敏志齋言
文達平生談藝心折吾子茲以相屬公意也曾
植聞命而愀然乃敬受而讀之終卷而置之閱
歲復再讀之乃起而復於志齋曰公之詩無庸
刪定也存其僅存者以傳後世以輔奏議譜傳
足矣古今別集之大凡有分體有編年而立於
千載之後尚論千載以前發潛而表微分體者

退思序

當不若編年者測而可知紬繹焉而音容如見
詩之言志而以會意言之亦得兼象於時夫不
曰治世之音亂世之音亡國之音者乎夫不曰
可以語可以道古乎毛詩小序三百而言時者
十之二皆其所賅廣博不可以一事詁訓者也
可以一事詁訓者則莫不指其時而序說之誠
知夫志與時之相摩相盪以爲詩也思其人者
方將準古一官一集之體以敘錄之存此數卷
比於崑山片玉桂林一枝略以寄諸君子之聲
欵想像而已文達公詩從容夷雅擬諸先唐作

者蓋張文貞公權文公之儔而賦景抒情瓌麗而清遠尤有與文貞相近者時之感爲風形容而爲頌正變嬗而爲雅固有動於自然而不知所以然者乎察其詞中之旨固不盡於其言曾植與公未接從容不敢妄有所論獨嘗憶昔與順德李侍郎遊論南齋人物稱公盛美不容口及今彷彿遇諸卷中人往風移九京之觀逝不可作執筆而訂公集乃亦不自知思蹇產而奚屬也噫宣統二年庚戌十月曾植書

退思序

二

國史本傳

張百熙湖南長沙人同治十三年進士改翰林院庶吉士光緒二年散館授編修五年充山東鄉試副考官七年

命提督山東學政九年丁父憂十四年充四川鄉試正考官十七年

命直南書房二十年恭逢

孝欽顯皇后六旬萬壽正月

賞加五品銜並戴花翎二月

京察覆帶奉

本傳

旨交軍機處記名以道府用四月

大考翰詹列二等得

旨以侍講升用是年朝鮮東學黨之亂日本藉端與我

開釁百熙以備員

禁近親見

宵旰焦勞屢陳兵事集師接濟之法固本扞衛之方捐助軍輸之策拘治奸細之律疏先後十餘上多蒙

采納及海陸軍連挫於日百熙復上奏謂北洋大臣李鴻章壹意以戰事為非並不督飭諸軍實力進

勦致使倭人逐日布置逐段增兵而我後路絕無準備軍械不足糧餉不繼即勇敢善戰如左寶貴聶士成等亦頓兵韓境進退失據近聞海軍兵輪俱為敵人擊敗我軍退保安州之後如再有挫衄則東三省岌岌可危應請

飭得力重兵嚴陣以守且必將領得人而後兵可得力因薦宿將前福建水師提督彭楚漢等又片劾軍機大臣禮親王世鐸以宗支筦樞務數年以來納賄招權無所顧忌亦無所補救倭人肇衅之初了無措置及我

本傳

二

皇上命伸

天討禮親王等又一切諉之北洋大臣若無與已事貽誤兵機大取挫衄伏願

皇上察以日月之聰明斷以雷霆之奮迅天下幸甚時點景工作猶未停百熙因奏言臣恭讀八月

上諭欽奉

懿旨本年十月慶辰典禮著仍在宮中舉行其頤和園受賀事宜即行停辦仰見

皇太后俯恤外藩預防內患高深之德至仁極明乃承辦諸臣不仰體

聖懷仍復於西直門內外張皇其事推諸臣之心不過謂敵人擾及邊陲

輦轂近地目前無事耳豈知犬羊之族詭計百出外省及天津等處拏獲雜髮改裝身藏軍火之奸細亦已不少況景物繁盛之會中外五大洲二十三省士民夾道縱觀所有點景設壇大率蓆棚木架地段較廣防範難周脫有不虞變生呼吸一夫竊發奸宄乘之倉猝之際何堪設想皇太后聖明在上必將以紅旗報捷為樂不以點綴景物為娛即我

本傳

三

皇上尊親聖孝亦必以

宗社安全為大請
敕點景諸臣懷遵

懿旨停辦以成

皇太后仁明之盛熾俾息謠傳而靖地方疏入稱旨百熙以外患日亟請修復

聖武大興邊防生自然之利輔鐵路兵械所不足又偕翰林院侍講學士陸寶忠等聯名劾樞臣孫毓汶等朋比誤國十大罪復與侍郎李文田等合詞請

旨起用恭親王俾管樞務以為倭人開釁據我外藩內而軍機大臣外而北洋大臣辦理乖方以致牙山平壤之役無所策應固由李鴻章意不欲戰貽誤事機亦軍機大臣等無有宏識遠略如當日恭親王之綜理樞務者也臣維恭親王懿親重望執政有年平定髮捻苗回諸匪才猷恢豁度越禮親王世鐸等遠甚昔宋哲宗朝宣仁皇太后起用司馬光為相遼夏之主至教其邊吏毋生事開釁今恭親王之賢不知於司馬光何如而親貴則過之我

本傳

四

皇太后之聖明尤非宣仁所及恭親王艱鉅重膺益當感激奮興力圖報稱薄海人心邊疆士氣必因此立加振刷不獨

朝廷綱紀足資整飭即軍務當有起色外患可冀救平矣未幾遂

命恭親王復入軍機二十一年威海失守旅順戒嚴百熙奏山東防務喫緊宜迅速擇要布置四月日本與我議和百熙奏和議條約傳聞駭聽請

敕下王公貝勒大學士六部九卿翰詹科道公同會議又以日本要挾過甚宜維後患急籌戰備以挽

危局迨和議已定百熙復請急圖自強以收後效臚陳管見十四條又言通商條約弊混滋多中國利權宜防損失請

敕通商全權大臣將日本臣民入口以後商務及中國自有之商務劃斷明晰詳慎訂議所言皆切中時弊五月授侍講十二月轉侍讀旋充

文淵閣校理二十二年充

日講起居注官旋擢國子監祭酒二十三年六月充江西鄉試正考官八月

命提督廣東學政十月遷內閣學士兼禮部侍郎銜十

本傳

五

一月奉

諭張百熙仍留學政任旋

特派稽察中書科事務蓋異數也百熙在粵倡設時敏學堂嚴杜闖姓之弊士論翕服二十四年三月重修會典全書過半百熙以曾充總纂奉

旨從優議敘六月遵議改變武科章程百熙奏上十二條曰編團籍別軍省開製造頒定式設學堂延教習籌經費嚴限制考輿地習測繪勤操練定考試九月以濫保康有為等部議革職

加恩改為革職留任十二月開復處分二十六年七月

補禮部右侍郎九月擢都察院左都御史

命回京供職十二月

派充頭等專使大臣百熙馳赴

行在二十七年二月覆

命得

旨仍在南書房行走時亂事初定

兩宮下詔求言百熙首抗疏陳大計五大端曰增改官

制曰整理財政曰變通科舉曰廣建學堂曰創

立報館略謂我

朝設官大半沿前明數百年舊制及通商以後事

本傳

亦

多創辦而官位不增惟設一總理衙門以綜理之遂使商務學務及一切新法悉隸總署各國無此例也任官之法莫善於一事分任諸人莫不善於一人普任各事如京員尚侍諸職今日習禮者明日使之知兵外吏藩臬等員此處掌刑者他處責以治賦弊不可勝言也其實中國庶官久任與夫專門分治諸法本極精詳徒以展轉變通致防弊之意太多任人之意轉少今欲因時制宜特加釐定應請以總理各國事務衙門正名外部不分滿漢設尚書侍郎各一人

專辦外交各事至內外一切商務宜專設商部

以總其成更須參考西書酌體中國商情定為

商律又宜由商部詳立名目分門頒發格式簿

令關卡及州縣地方各官隨時填報年終由部

彙齊編為商部歲計總冊用資考覈各省舊有

之商務局應改為商務衙門設實任官使上隸

於本部其無商務局者亦照此辦理一切商務

利弊申訴等事悉令赴本衙門呈控至學校一

門尤關緊要今日禮部所司僅稽覈成案例行

文書而已若議

本傳

七

京師暨各省廣設學堂則於詳定章程廣籌經費暨編輯教科新書等事均非設立專部不足以事創舉而得真才應請增設學部如商部例所有商部學部設官位數亦擬照外部例設尚書侍郎各一人至農政切於民生亦為當務之急擬請推廣各省農政局歸戶部總理無庸並設農部以免同時並舉之煩財政則議加進口稅整頓國法推廣銀行講求礦務通行鈔票由部鼓鑄銀圓變通科舉則請用張之洞分場考試之法廣建學堂則議創設小學中學大學及資

遣游學生出洋習專門之業創立報館則議開辦官報編定報律分設譯書等局且謂今日國勢如斯欲濟時艱振全局又不僅在條目而在本源區畫既定諸事待行其本尤在上一心內外一心滿漢一心庶幾無事則一德以圖自強有事則同力以禦外侮又奏修改商約慮失利權宜籌抵制補救之法曰洋關進口稅宜示區別曰無益民生貨物宜議重徵曰進口食物無稅宜示限制曰鐵路礦產宜准令中外合辦曰養游民宜廣興工藝曰機器製造貨物廠宜

本傳

本

嚴旨責成疆吏以振之恭引

祖

宗故事請將輔佐不職遺誤大局之樞臣泄沓偷安罔上行私之疆吏喪師失地之將領病民蠹國之監司牧令明申憲典肆諸市朝以慰天下之望

是年四月

迴鑾有期

特派百熙與桂春景灃陳夔龍修理蹕路六月遷工部尚書兼署都察院左都御史七月調補刑部尚書百熙回京後奏裁向來工程節省陋規計省帑金近百萬又以臺綱久弛分別舉劾奉

諭該尚書此奏洵能破除情面舉劾一秉大公深堪嘉尚嗣後各衙門堂官皆當隨時考察激濁揚清以肅官常而昭懲勸該衙門知道九月遵議變通翰林院規制奏言國家取士之法視前代為尤密一省

本傳

九

之士多者萬餘拔其尤者為舉人會試之士一省數百拔其尤者數十人為貢士貢士之中拔其尤者為翰林擇之可謂精矣而舉世以不達時務輕之沿江沿海之人日與外人相習其所學乃能為國家之用夫取之而不用是取之非其道也用之非所取是不得已而用之也欲救其弊莫如使取與用出於一欲取與用出於一莫如使今日已取之士盡習有用之學經世之學不過二端曰政曰藝擬請

旨將翰林院官制酌量變通改掌院學士為尚書以領

其事廢詹事府以詹事少詹事爲侍郎升講讀學士爲三品庶子以下併爲侍讀侍講等官令學士以下各視性之所近分研實學以備時用人才之興必有超出學堂之上者是月有作育人才端在修明學術之

諭百熙請將京師大學堂改隸國子監正名大學以一學術而育真才推論前年於國學之外又設大學意見多歧人才不出之弊請

旨將國子監定名大學

簡放管學大臣由政務處王大臣會同管學大臣並集

本傳

京外通人酌采中西有用之學妥定畫一章程俾生徒得以時肄習又請改總理衙門附設之同文館隸於大學派員辦理提調事宜十月調吏部尚書十二月

派充管學大臣

經筵講官

命妥訂學堂章程隨時具奏二十八年正月奏陳籌辦大學堂大概豫定通國辦法宗旨先開豫備速成兩科豫科爲入大學正科之豫備速成科則分仕學師範兩館仕學館造就已登仕版者以

應目前創辦新政之需師範館則爲中學堂教習之用兼添設講舍附設編譯書局廣購書籍圖器籌撥的款言之甚備又奏設醫學實業館譯學館宗室覺羅八旗學堂吏部書吏厯世盤互舞文巧法爲吏道之蠹百熙奏整頓吏部事務凡六事首裁書吏責成司員用士人繕寫稿件除苛例之不便者數十條皆奉

旨如所請行三月隨

扈謁

東陵

本傳

十

賞穿黃馬褂七月奏進所擬各級學堂章程參酌古今中外之制分級分科限年畢業大旨務歸於實用

明詔獎其周備頒行各省令各督撫實力奉行百熙又以教習乏材資遣高等生四十餘人分赴東西洋肄習專門以爲各省倡各省之派官費留學生自此始十月

賜紫禁城騎馬二十九年正月

上命刑部尚書榮慶會同百熙管理大學堂事宜二月上謁

西陵

命與慶親王奕劻等分日輪班在內值宿五月以

殿試刊刻題紙錯誤交部照例議處七月兼署禮部尚書九月充政務處大臣旋改管學大臣爲學務大臣奏設教習進士館三十年二月充會試副考官八月奏遣新進士出洋游學三十一年四月改授戶部尚書十一月奏請先設法政科文學科格致科工科以備大學豫科學生及各省高等學生畢業後之升入並勘廣安門外瓦窰及德勝門外官地各一區均合建造大學堂之用奉

本傳

主

旨議行是月

詔立學部百熙乃銷學務差十二月兼管順天府府尹事務三十二年四月百熙年六十

孝欽顯皇后賜御書匡時耆德扁額

德宗景皇帝賜御書平均錫福扁額及諸珍物五月舉

劾順天州縣請

旨嘉獎降革有差百熙歷充考試漢陰生考試試差考試各省優生各省駐防繙譯舉人覆試新貢士覆試新進士

朝考閱卷大臣新貢士

殿試讀卷大臣先是

朝命鎮國公載澤等五大臣出洋考查政治銳意變法至是先後歸百熙以變法宜先統籌全局若支節而爲之則先後均於寡效因上疏論官制及地方自治兩事謂非速定官制則提綱挈領無以集政權於中樞非速興地方則至纖極微無以被精神於通國蓋官制者政治之機鈐而地方者國家之分體誠使內外官制定而地方制度興則諸事易行而萬端可理也因考歷代成法之精密及外國成績之顯著以備採擇

本傳

主

七月

命與載澤等充編纂官制大臣九月改定官制之

詔下特設郵傳部綜轄鐵路航業郵政電報四項百熙

調補郵傳部尚書十月

賜西苑門內騎馬郵傳創辦伊始經緯萬端百熙及侍

郎唐紹怡意見不合十一月均奉

旨嚴行申飭十二月因病請假三十三年正月病篤奉

懿旨派內務府大臣增崇看視傳取方案

頒賞肉桂於朮諸藥品二月卒遺疏入

諭曰郵傳部尚書張百熙公忠清亮學問閎通由翰林

入直南書房壘司文柄洊擢正卿均能恪盡厥職辦理學務尤著勤勞上年調任郵傳部尚書創辦伊始正資擘畫旋因患病賞假方冀調理就痊長承倚畀茲聞溘逝悼惜殊深著賞給陀羅經被派員勒載洵帶領侍衛十員即日前往奠醊加恩追贈太子少保銜賞銀二千兩治喪由廣儲司發給照尚書例賜卹任內一切處分悉予開復應得卹典該衙門察例具奏伊子江蘇試用道張振鏞著以道員即補張振鋈張振鎰均著俟及歲時帶領引見其靈柩回籍時著

本傳

由

沿途地方官妥為照料用示篤念蓋臣至意尋

賜祭葬

予諡文達

退思軒詩集目錄

卷第一

對酒

短歌行

詠蘭

織素篇

贈李星甫

衡陽舟次

草市靈山麓石井泉歌

登岳陽樓

退思目

同黃稚樹司馬

秩柄

李小舫大令黃鵠

磯夜眺

羅伯宜太守

章輓詩

留別小舫大令

武溪深送東臯從叔從軍貴州同伯兄

作

君山

減茶圖應謝麟伯編修

維藩

食瓜和王壬秋孝廉

閻運

偕謝麟伯編修丁竺雲

蓉綬

同遊海澱

有作

麟伯招飲陶然亭作集者爲周編修桂

午徐主事叔鴻王孝廉壬秋左孝廉

厚齋家伯兄雨珊暨予凡七人

同諸公登法藏寺塔

夕照寺壁陳松畫松歌同伯兄作

金臺感事

新疆

薊門

祁連

退思目

寄李星甫武昌

世運

杜公亭

送友人入黔

郭二丈意城京卿雲臥山莊詩三首

聖駕謁

陵恭紀

題吳廣文石筍山房圖

宋徽宗畫鷹歌

書乘槎筆記卷後

短歌行贈王瓌欽明經德基

題某太守松鶴圖某故曾太傅幕府客

誦丁竺雲戶部近作銅狄荆榛內府錢

之句感賦二首

別屠梅君庶常仁守

葉縣

酬秦夢九同年錫齡

擬古

襄陽弔孟山人

飲桂軍門武毅營

退思目

羊太傅祠

黃鶴樓

香港

登大沽礮臺同羅軍門榮光史都督濟

源

名園

選輓羅旋吉軍門逢元

蘇小墓

塗山

蕭二丈問樵圖

吁嗟乎行九首

卷第二

桃源望隔江諸山

辰龍關

自玉屏赴貴陽道中感述一首

甲秀樓鐵柱歌

聞笛

怡園白鶴歌和高七觀察觀察所如不

合欲歸未果因以諷之

綦江道中

退思目

浮圖關

丁穉璜宮保大節署讌集談及山陝近

事感賦二章即呈丁大

北雁

題畫

惠陵

武侯祠

江城

訪籌邊樓遺址有作

謁少陵先生草堂兼展陸放翁遺像

再過草堂弔杜陸兩先生感賦一首

贈鶴籌太守即題其壯游詩草

巴部

書感

大佛巖

嘉陵道中

市橋

書夢

晚泊

野寺

退思目

懷郭侍郎師倫敦

懷吳孝廉西域

白帝城謁昭烈廟

瀕瀕

峽風歎二首

神女廟

三峽舟中雜詠八首

歸述

送仲兄之郴州時予亦將北上詩以寫

懷

江豚行

秋花

哭仲兄

夜坐誦程伯翰擬古詩有觸賦此即東

伯翰

從弟沅蓀自塞外入都喜賦二首

病中得李幼梅杭州書

送沅蓀赴平山

古風一首為某侍御作

大行孝貞顯皇后輓詩

退思目

木

送黃觀虞前輩赴

晉祥峪陵差

送鄭荇汀同年赴蘭州

別意四首

聞瓊嶽入滇卻寄

秋風

卷第三

雙槐行示蘇主事栗堂

題郭筠仙先生撫粵時荔灣話別圖一

首

君貽伯翰見過

萬柳堂

寄張樵野觀察蔭桓濟南

九日

仗馬

靈臺

華堂

漢相

腐儒

南國

退思目

七

海上

十洲

雪中同王祭酒先謙瞿學士鴻機唐給

事樹楠孫編修宗穀黃檢討自元徐

員外樹鈞龔主事振綱天甯寺集錢

送相國恪靖侯赴江南制府

題話別圖應孫子與秀才

濟南使院八詠

憶明湖荷花

雨中同諸公登千佛山

遊泰山三首

蘭陵道中

發沂州

由泰安至張夏書驛館壁

越南貢使阮恂叔雲麓唱和詩卷爲同

年李幼梅觀察題

陌上桑三十二首

卷第四

感述二十首

客兵

退思目

陳守如麓雲仙館圖歌

交歎

送孫涵若東遊

送舍弟嘯石入閩

秋懷

同年朱蓉生侍御一新以言事改官賦

贈一首

與李憲之方伯嘉樂談邊事感賦即贈

偶成

九日飲樂椿園因憶去年重陽時與同

人遊長沙賈太傅故宅悵然有作

過蔡興循兄寺居

擬古宮詞

送俞陔譜大令成慶之官竹山

再贈陔譜

抑園雜詩十二首

湘祠和黃再同編修國瑾詩韻

和黃麓泉戶部膺湘軒雅集之作

送孫君異點隨使日本

四月十九日作

退思目

九

長歌行東再同編修即用其鄉祠宴集

詩韻

西風

題瀟湘寄舫

青城山歌題易中實觀察順鼎舊游圖

冊

醉攜紅袖看吳鉤軸子爲鄭芝孫太守

業敷題

卷第五

陳竹香同年以潞河秋感詩見示悵然

有作

和張樵野保定道中見懷之作即次原

韻計距樵野作詩時十年矣

同聽秋聲圖爲志伯愚閣學題

題蓮沼盟鷗圖三首

雜擬十九首

前獨漉篇

後獨漉篇

漫吟

有感四首同瞿學士

鴻機作

退思目

和黃麓泉戶部九日天甯寺登高之作

和宋芸子編修雪後對菊寓懷之作

贈屠梅君侍御

仁守

雜興詩十七首

題瞿魯青先生自繪二圖

贈龔省吾儀部

鎮湘

春隄試馬圖爲何潤夫京兆題

感賦

漫興

秋感八首

卷第六

畫馬

閒雁二首

潮州劉教授

鳳輝

以所輯東坡居士居

儋錄見貽意有所感遂題其後

意有未盡再題二律

余題居儋錄詩幕中諸君皆有和作

此報之

寄胡德齋大令

欽南昌

和龔省吾太守廬居八詩

退思目

贈汪太守

昉綬

廣秋宵七恨

游羅浮不果卻賦

擬游羅浮先之以詩

錢南園通政畫馬爲徐頌閣宮保題

再題一首

南園畫馬爲翁尚書題

題故朝邑相國閻文介公慕槐仰梧書

屋圖

酬舒棠陔茂才即贈

贈程子大茂才

題韓翠巖小影

峽山寺二首

門人張奇田孝廉為峽山古蹟詩余亦

同作四首

補遺

孤鸞吟為湘鄉成貞婦作

劉博泉給諫前輩為觀荷之會招同陸

鳳石侍讀

潤庠

秦雨亭庶子

樹春

陳

竹香檢討

存懋

高曦亭編修

廣恩

飲

退思目

丰

北淀酒樓賦長句一首

同年陳竹香檢討招同諸公泛舟南河

小飲王氏園林五首

秋夜

題南安太守周君瀚如

結

庚嶺補梅圖

陸鳳石同年屬題某君春谿晚渡圖

題張樵野侍郎奉使圖

送游子岱方伯之官廣東

寄贈曹永昌六首

陳竹香同年屬題玉堂補竹圖即以贈

別

感事抒懷詩八首送同年陳竹香太守

之官浙江

續感事抒懷詩八首送張劭予同年歸

觀河南

驂鸞

和時百廣水驛詩原韻

實甫以近作詩卷見眎賦此答之

日前以戊戌秋中所作詩送實甫審定

得復書題詩一首依韻答之

退思目

丰

綠柳

感事

和樊山廉訪贈詩原韻

附原作

附和作二首

原詩見第四卷

退思軒詩集目錄

退思軒詩集卷第一

長沙張百熙著 門人汾陽王式通校

對酒

天門開降百祥乾坤以清甯日月重光願稽首
上訴天帝皇祚我下土世世如虞唐

天子神聖萬壽無期端拱垂衣百官贊襄自丞
相以下文武吏大小內外都賢良用燮和萬邦
朝四夷坐明堂山海重譯來享王偃兵革不用
斷獄皆平百姓熙熙皞皞大有年千倉而萬箱
以時臨辟雍車駕煌煌脩明禮樂文章化成天
下風俗歸敦龐史官珥筆書並雍容揄揚美哉
乎盛事難一一具詳委蛇地下臣對酒陶然稱
兕觥歡欣鼓舞樂且無央

短歌行

赫赫名都翼翼高堂明鐙列燭主人壽康賓筵
既張絲竹備舉觥籌交酢式燕且舞短歌者誰
挾瑟在門四座勿誼賤子具陳春華載芳濃露
始粲維桃與李灼灼其爛青陽告徂景光遂非
但見甲第連衢列堦彼哉富貴豈伊匪樂一朝
傾覆門有羅雀雀羅尚可鴉鳴則那俯仰今昔

涕淚交墮念昔冠蓋來如水流今何人斯去若
風休醴飴惟甘荼蓼斯苦嘉餽惟旨食梅斯楚
後有翟公前有蚡嬰不盛不衰不知物情鐘漏
驚行君且休矣烏曉月落餘晷能幾

詠蘭

春雨春山裏芳蘭倚靡時秋風吹更好生近屈
原祠采采涉湘水願言遺所思含情莫我顧惟
悴路傍枝

織素篇

少小工織素結髮上君堂操作怯細步鳴機入

洞房密密雙同心軋軋千迴腸縱橫自爲理繡
綵遂成章小大稱身裁脩短著意量作爲合歡
襦久久置君傍相須締襟帶幸不愁冰霜昨歲
君遠行蜀越泛舟航越羅顏色鮮蜀錦藻葩揚
邁新美爭炫厭故情靡常棄我舊時衣豔彼初
製裳妾身既已違微物意不將妾意豈足恤君
體將無妨文繡信爲美絲絮誠足臧溫厚久能
恃浮美弗可長君心亮不察攬涕獨傍徨

贈李星甫

亂後家何在依人數口存流離如昨日翦紙幾

招魂旅食消春色綈袍浣淚痕故園愁不見擾
擾戰雲昏

衡陽舟次

城郭日初夕關河秋欲霜人隨湘水遠天帶嶽
雲涼疏柳依荒渡寒花隔故鄉離心與飛雁一
夜過衡陽

草市靈山麓石井泉歌

嶽神上燭星吐芒倒截平地波為涼靈山山靈
肅拱揖古壁凌削森鋒銚幽泉迸出罅欲裂甘
勝膏露承天漿市人奔走用綆汲裏潔外垢陰

退思軒

丰

合陽纖鱗游泳澈見底吹浪細蹙機相忘大魚
搖尾露三寸匿不見首心猜詳得非神鯉挺一
角龍德欲隱形先藏吁嗟奧壤始誰鑿以甃甃
井石質剛斜窺漏孔劃一綫五丁手縮百怪僵
仙之人兮來傍俚爽籟靜入風中篁回看峰頂
薄雲際似鳥插翅兩臂張我來草市正秋晚偶
聽峭壑聲礧礧停車為飲一瓢水濯纓此意同
滄浪

登岳陽樓

城郭古今秋平湖日夜流少陵不可作今我獨

登樓憂樂幾人在關山戎馬愁蒼茫無限意乘
月下扁舟

同黃稚樹司馬

秩柄

李小舫大令黃鵠

磯夜眺

危磯高瞰俯百尺入望蒼茫天地青拍岸波濤
九秋雪隔江燈火萬家星雲橫雁鶩宵涵影風
撼蛟鼉氣帶腥放眼山川一明月側身人海幾
浮萍

羅伯宜太守

萱輓詩

鼓角黑風沈蠻煙戰壘陰韞刀薄岩險血甲委

退思軒

四

山深共有千秋節

與黃少崑方伯同時殉難

難為二老心九

原應未瞑想見涕沾襟

留別小舫大令

黃鶴樓高倚笛枝梅花淒絕別離詞清霜繡堞
唳鴉處細雨寒江立馬時客袖酒痕愁渺渺驛
亭帆影晝遲遲晚來寥落溪橋泊雁過鐙昏獨
爾思

武溪深送東皋從叔從軍貴州同伯兄

作

武溪深乃在長沙西狂瀉洶涌塞雲墨鳥飛不

下猿哀號自從寇亂來風雨長淒淒官軍連年
爭渡此十人援黔九人死黃飄三軍不得歸血
染千山萬山紫辰龍關前方進兵君也慷慨躍
馬行短衣橫刀作戰士殺氣隱隱眉間生君年
半百不稱意男兒骯髒時不利未肯低頭老鄉
里且復昧首從軍吏噫嘻黔賊如蝟毛出入險
阻同飛猱鏖除巢穴倚兵力攻心要取奇謀高
運籌此去到帷幄拄笏不須輕馬曹行乎勉矣
君賢勞

君山

退思軒一

五

揚舲汎輕颿晴湖散芳靄融怡睇中流孤嶼媚
春黛夷猶望轉迴神境宛人外緬邈帝子靈飛
龍盛容衛翩翩降北渚鳴玉儼嘉會楚臣吁媒
勞排側阻石瀨遂遺澧浦襟寂寞委蘭佩脩姱
亮終立衆芳實蕪穢嬋媛夫何爲荏苒時不再
嗟無蹇脩理遇合等百代騷心鬱湘山覽古寄
遙嘅

減茶圖應謝麟伯編脩

維藩

君山之茶天下無品奇味美香色俱佐供包茅
貢天子朝貴往往珍其餘君家舊傍君山居門

前老樹豐雲腴自言平生酷嗜此頗與世俗酸
鹹殊豪情泥飲慣奔走往事回首悲歎歔大湖
以南馳羽書大江之北多邱墟中原道路莽豺
虎顧渚紫筍淪榛蕪龍團鳳餅久寂寞茗戰那
復能歡娛長安病渴愁相如

翠華望斷昆明湖憂來忽改天地色灑涕痛哭
迷蒼梧蒼梧山高渺難即密雲舊製空追憶近
世紛紛厭梁肉幾人解似盧仝癖如君癖此歲
月深冰壺玉椀常孤斟茶經刪訂亦常事破睡
莫擬悲來吟嗚呼恐觸攀髯心

退思軒一

木

食瓜和王壬秋孝廉

闔運

翠蔓登瑤席霜刀劃水開幽風及葵菽夏正後
桃梅聞說

先朝賜

文宗朝哈密進瓜臣工例得賜食

無勞別圃栽何時清

碧海西域種能來

偕謝麟伯編脩丁竺雲戶部

蓉綬

同遊

海澱有作

博啟

離宮地艱難

列聖心鯨波滄海動

龍馭鼎湖深

御道猶存昔游蹤共愴今

先皇有遺痛頤利未成禽

車駕罷巡幸封人廢掃除蒼梧春不返離黍感

何如喜抑中官侈言懲御史書

嗣皇躬節儉莫更議園居

同治九年安太監得海稱中旨采買段

匹所至悉索至山東德州建龍鳳旗幟為巡撫

丁寶楨奏論斬之部官某以利誘御史德泰

上言脩復園居按畝加稅

詔旨切責某事露亦得罪

斷瓦黃金殿荒垣碧玉墀即今游歷處想見治

平時積雨宮花委寒煙苑草滋內監頭白盡垂

涕話興衰

守園董監年六十餘宣宗時小使

沙徐樹鈞叔鴻及家兄雨珊遊覽

園董董監為述文宗時事甚悉

麟伯招飲陶然亭作集者為周編脩桂

午徐主事叔鴻王孝廉壬秋左孝廉

厚齋家伯兄雨珊暨予凡七人

良辰眷嘉招飛蓋恣冶遊翩翩盛裙屐茵轂駟

鳴騶南窪古江亭枕阜面清流幽花媚晴蝶老

樹森蟠虬蕭蕭蘆葦風五月衣裳秋主人翰林

彥開軒命觥籌捲簾見西山蒼翠城西頭頗疑

青鳥期不來丹訣難可求曜靈瞬如馳結想徒

悠悠不如飲美酒共洗蒼茫愁

同諸公登法藏寺塔

人多乾隆時高麗人題名

三山不可到颯沓回神飈幽探得浮圖百尺凌

層霄盤空躡危磴捫石曲且坳森然出枝撐意

態慄不佻山川拱畿甸俯視青迢遙美哉帝王

州氣壯風雲高沈思太平日玉燭時和調華夷

皇風遊讌無虛朝如何感今昔登眺以寂寥嗟

爾題名人際會雍乾朝

退思軒上

夕照寺壁陳松畫松歌同伯兄作

漁洋雙松歌絕倫問松我亦尋慈仁擘天老樹

化龍去古翠冷落山門春欲持東絹寫直幹畢

宏韋偃無其人陳松何物特狡獪腕底煙雲走

光怪入門解衣磅礴羸落想超然到人外夕照

之寺京城東殿壁五月生清風縱橫潑墨作虬

舞百尺夭矯根葉同翻疑慈仁松不死雷雨飛

騰颯如此陰森勢若動神鬼倒拔真看謝泥滓

松乎松乎爾畫寂寞良足嗟長安第宅多豪家

姚黃魏紫列屏幃亦有桃李嬌春華縱橫此筆

獨何用止合圖寫枝杈杈噫吁嘻得不惜爾枝杈杈

金臺感事

圓明宮殿閱蒼苔鎮日煙霞鎖未開福海衣冠忠義盡淀園風雨鬼神哀祇今跨水分巖地不見開雲鏤月臺聞道

垂裳

三聖主一時同駕六龍來

咸豐十年庚申六月日夷人入寇遂至園

宮管園大臣文豐拒之不得還入福海投水而死
鑾月開雲舊名牡丹臺康熙五十五年高宗以皇孫侍聖祖宴賞於世祖邸園即其地也

退恩軒

九

淮水非關樂鼓鐘泉刀已竭大司農斬鯨遼海無長劍立馬蓬萊有夕烽魏郡秋桃悲晉帝咸陽麥豆感唐宗
鸞輿盼斷端門路回首蒼梧雲萬重

新疆

新疆西北幾千里阻絕長城落日斜未必邊防全撤戍不聞都護更鳴笳烏孫譯道通中國冒頓雄心伺漢家柔遠慎脩干羽德宰臣休擬棄渾邪
萬國車書拓九邊蠻荒重譯達

堯天漢皇宣室求賢日穆考靈臺望稷年南越自脩馴象貢西周誰作旅獒篇淒涼荒草銅犀路十載昆明有暮煙

乾隆中修昆明湖成作銅犀勒銘以紀庚申之亂犀尾毀折事定以棘圍之

朔漠天高見薊門

禁城兵馬帶雲屯六軍容衛唐龍武八校聲威漢虎賁海內瘡痍猶未復秋來

巡狩忍重論賢王親授黃金鉞珍重師垣壯

九閣

薊門

退恩軒

十

薊門西阻太行山閶苑層城夢寐閒北極風雲環鳳闕中天星斗拱燕關

宮闈儉德宜

沖主臺閣孤臣戀

聖顏

臨御自今無闕事虛勞白髮老鸕班

時世父竹屋侍御官

祁連

祁連山色冷斜暉嘉峪關門接翠微萬里旌旗兵氣肅十年霜露羽書飛負嵎賊膽寒應破報

國臣心老不歸驍騎騰驤能敵愾酒泉邊草入秋肥

寄李星甫武昌

楊柳鄂王城旌旗漢上營秋風淒入暮落日不勝情薄宦近何似詩懷應更清聊憑鴻雁語一訊玉溪生

世運

世運張羣盜中原殺氣多孤臣專斧鉞百戰定山河異數通侯賞成功清廟歌忽聞天柱折東望涕滂沱

退思軒

上

杜公亭

關山浩蕩兵戈裏飄泊餘生路幾千亂世無家衰病日悲歌流涕中興年長安西望多明月相水南來有瘴煙投老草堂歸未得楚江臨眺重淒然

送友人入黔

書劍此獨往關山得縱觀金刀飛鳥度銅鼓赤虵蟠閱險嗟兵事臨邊感覺端有謀能善後盡力贊王官

幕府容長揖戎旃跋壯猷風雲千嶂險衣服五

溪秋亂後民多散軍前箸可籌寄言諸將吏慎莫急誅求

郭二丈意城京卿雲臥山莊詩三首

麟閣雲臺外如公天下聞遂耽南嶽隱不媿北山文地有園林闢門無車馬紛艱難舊時事籌策見湘軍

梓木當年洞聲名左郭齊看人半旌節避地一鋤犂林臥花侵戶門開竹滿谿山中自怡悅不必讓東西

退思軒

上

夫子玉池叟蒲塘地亦偏最難兄弟樂更得子孫賢林影高低屋茶香遠近泉幽栖真不易喜見泰平年

聖駕謁

陵恭紀

泰運中興日

乾綱獨斷時延鴻

九廟澤貽燕

兩宮慈不廢家人誼彌深

達孝思珍羞唐典禮

園寢漢丕基素服春風展黃麾瑞靄滋陵臺陋

豐沛幄殿抗蒲池往者悲遷播中原值亂離澶
淵安宋趙洛邑纘周姬屢會通和議猶稽問罪
師豈曾忘北伐終擬殄西夷游渚遺龍王當
軒薦鳳匣蒼雲藹花蓋紫蔭燦松枝曉炬雙行
撤

宸輿再拜辭九霄聞

聲欬一慟愴

神儀

大德同觀感微生解涕洟固應謬誇士黼黻佐
昌期

退思軒一

七

題吳廣文石筍山房圖

廿載風雲戰伐多青銓元鬢獨絃歌春生絳帳
宜桃李夢入蒼山有薜蘿濁酒夜傾銀錯落短
筇晴倚石嵯峨紛紛肉食登臺省寂寞何人樂
澗阿

宋徽宗畫鷹歌

乾隆中書今為恪靖伯家物

北風獵獵摧荒蕪霜威肅殺草木枯蒼鷹突出
怒欲搏金眸鐵爪兩翮俱炎天素壁動秋氣鳥
雀不敢喧庭除揮毫想見退朝暇特賞神駿為
歡娛豈知六賊弄朝柄中原鴻雁聲相呼官曹

巢鷺不得別胡陣鵝鵠爭長驅嗟爾鋒棱困羈
紲側目睽睽悲邱墟此畫留遺獨千古

國朝以來充內府

乾隆聖人賤珍玩

勅賜廷臣挂堂廡流傳江表經百年近時委棄
遭烽煙左公得之自瓦礫拂拭綃素猶完全古
意填胸浩盤鬱重是

先朝禁中物翰墨縱橫數鉅公令人神往承平
日

退思軒一

十四

今皇御宇垂衣裳中興將帥同鷹揚掃除狐兔
灑毛血喜聽丹鳳鳴歸昌麒麟圖畫近誰在努
力致

主如虞唐內臣

召對

弘德殿密語時或箴禽荒

離宮年年長春草息游罷獵荒馳道屏除玩好

崇

聖德

朝政清明民不擾吁嗟乎花石虐民君道乖但
精繪事胡為哉君不見五國城邊沙似雪祇今

惟有暮鴉來

書乘槎筆記卷後

帝遣承光御二龍海門雷雨壯心胸防風慎莫干

天討玉帛塗山已萬重

黃沙白日劍光寒霜壓蒲萄簇錦鞍

天子恩深漢昭帝不教西域斬樓蘭

短歌行贈王瓌欽明經德基

利莫如昆吾刀陸斷虎兕川屠蛟佩之辟不祥
魑魅遠遁逃一朝獻人主飾以寶匣黃金縹駿

退思軒一

五

莫如大宛馬五花滿身汗流赭卻立崢嶸山谷
閒騎嘶矜寵風塵下時來騰蹕日千里錦作障
泥帶銀鈐已矣哉張華伯樂今世無寶刀良馬
胡爲乎爲君作歌三歎息不如痛飲偕屠沽嗚
呼寶刀良馬胡爲乎

題某太守松鶴圖某故曾太傅幕府客

吾家老屋松千尺曾記兒時放鶴來永夜風濤
涼枕席太陰雷雨逼亭臺披圖隱觸歸田志解
組爭思入幕才舊事不須談戰伐海雲如墨角
吹哀

誦丁竺雲戶部近作銅狄荆榛內府錢

之句感賦二首

漢家三十六宮春曾說

先皇鳳輦巡舊日與君同極目秋風回首重傷

神一時中外觀初政

九陛勤勞望

聖人防海直須虛內府漫言銅狄已荆榛

忝躡夔龍入鳳池曉隨天仗拜

彤墀九門自肅風雲氣

三殿欣瞻

退思軒一

六

日月姿爲想

垂簾堯舜日不禁流涕

聖明時都俞吁咈千秋事聞道桓榮是帝師

別屠梅君庶常仁守

風塵荏苒黑貂寒異代關河馬上看曉日一鞭

揮手別亂沙如雪慘征鞍

葉縣

飛鳥翩翩下九霄至今仙吏說王喬我來不見
雙鳬影落月荒城夢早朝

酬秦夢九同年錫齡

故鄉嗟爾路迢遙亂後民如草木凋話到十年
兵火事夜深茆店雨蕭蕭

擬古

玉轡綠螭驄金鞭紫騮馬記得昔年時相逢峴
山下

襄陽弔孟山人

五字終南句真成遇合難風流孟夫子何處鳳
林山

飲桂軍門武毅營

屹然雄鎮控樊城王帳牙旗上將營馬足車塵

退恩軒

七

淹旅客翫肩卮酒媿書生筵前白月鄉心冷簾
外青山峴首橫聞道羊公祠宇近飲醕如見古
人情

羊大傳祠

凡才無大計始事動色變太傅社稷臣平吳獨
先見方公鎮襄陽威德江漢徧入朝抒籌策慷
慨洛陽殿同心得張杜羣議帝不眩終資武庫
略克敵板橋戰遂下石頭城功成儼操券維公
實前歿流涕繫主眷遺祠屹千載裘帶爛且絢
想見南州民巷哭永悲戀往來世今古搔首騁

遐眇不見峴山碑深思藻蘋奠

黃鶴樓

黃鵠磯邊黃鶴樓樓前黃鶴渺悠悠古今落日
又西下江漢之水長東流往事百戰忽如夢倚
欄孤吟淒欲秋能詩崔李更誰在但有白雲千
載愁

香港

臺影海珠沈龍蛇撼到今粵中自海珠虎門諸
磯臺嶽毀以來夷患
甚地疑人境絕山惜鬼工深天意捐荒島濤頭
激壯心

退恩軒

太

聖朝柔遠德感歎一哀吟

登大沽礮臺同羅軍門

榮光

史都督濟

源

銀濤如雪拍天來大燾風高上將臺畿輔地形
連海闊乾坤秋氣帶潮回二三坐論時何補十
萬橫行志可哀太息玉池頭白叟島煙深處片
帆開時郭筠仙先
生奉使西洋

名園

君不見姑蘇城畔名園裏複道迴廊何邈迤錦
石秋花絢爛看山亭水閣參差起主人未知誰

姓氏但道高官殊濟濟吁嗟乎漢家離宮罷不
修重惜民力憂民憂主人豈不感

明詔更購良工製綺樓

同治十三年詔
罷圓明園工作

遙輓羅旋吉軍門

達元

千里虞歌黯斷腸更堪橫笛起山陽心驚宿將
凋零日淚灑中原戰伐場舊壘風聲秋瑟瑟故
園雲氣晚蒼蒼知君此去多遺憾披髮攷弓下
大荒

蘇小墓

油壁香車渺莫追桃花流水不勝悲西泠過客

退思軒

九

無人識欲結同心向阿誰

塗山

黛色壓揚州茫茫禹甸秋憑陵幾千仞傾動萬
諸侯玉帛無今日龍蛇更隱憂荒涼疏鑿意誰
盡白雲求

蕭二丈問樵圖

先生讀書好奇服餘事妙擅青囊經陰陽闔關
洞至理不獨巧窮山水形長沙奧區幽且清左
帶衡嶽右洞庭黑麋峰高不知幾千仞上有神
仙之府朝百靈先生家近麋峰麓選勝探奇蘭

雙足徜徉泉石恣登眺脫略衣冠謝羈束朝隨

野鹿遊暮趁歸鴉宿山名每從老樵問林影依

稀入寒綠幾時續圖橫以長重巖複岫煙微茫

側身拄杖定何許一瓢一笠鬚眉蒼盛年豈意

置邱壑北走幽燕沂河洛文章屢躋京兆試豪

蕩那知客懷惡天門嵯峨攀岱宗壯觀語我心

猶雄看潮龕赭若前日自顧瞬成頭白翁白髮

蕭蕭傍鄉里世態浮雲空眼底夥頤富貴安足

論零落古今同一體夕陽村疇嵐市桐帽稜鞋

且休矣不見老樵歸去百事無醉臥日高呼不

退思軒

十

起

吁嗟乎行九首

荒江荒江莽愁寂北風吹江雨浙瀝孤舟震蕩
不得息終朝盤跚在枕席撫景傷時黯誰語百
端茫茫耿胸臆吁嗟乎寒天無光日蹉跎獨夜

奈此荒江何

昔歲待詔

乾清門叨陪臚唱排

天閣瑤階咫尺拜

龍袞下士喜瞻

天子尊滄江一臥歲華改

聖虞樂輟蒼梧昏吁嗟乎北辰高高雲氣墨乾坤萬物無顏色

高堂明鏡白如月高堂老人鬢成雪山居樂事無不爲弄孫飲酒自怡悅七十身經百憂患不忍翻從舊時說吁嗟乎百年荏苒夫如何我父我天兒罪多

兒有母今在庫塘石室冷落多風霜早春謁母母不見但見松楸如我長十年血淚實黃土草色欲死青荒荒吁嗟乎白雲孤飛渺何處啼鳥

啞啞暮天樹

退思軒一

王

長安城中酒家樓侍御

世父竹屋先生攜我春夜遊阿

兄豪興呼觥籌王君

壬秋孝廉逸才邁時流黃

徐

叔鴻主政左厚齋孝廉謝麟伯太史

半生死此會一瞬成千

秋吁嗟乎竹林蕭條隔湘浦感昔傷今涕如雨

衡山之雲接天起大風吹雲度河水雁鳴雖離

河上來矯翼分投各千里天涯兄弟失歡聚霜

淒日炎途路裏吁嗟乎男兒孤矢志四方生別

輾轉摧中腸

北山虎狼水蛟蜃磨牙噬毒何蠢蠢風煙慘淡

俄頃中生人無聊膏血盡巉崖惡浪射不得袖手愀然看顛殞吁嗟乎伐蛟制虎古有聞毀機壞網伊何人

有鳥有鳥名比翼朝飛聯翩暮共息云誰之思慘不憚念我同室遠離遯晚春淒涼向遙夜刀尺在几鐙映壁吁嗟乎寒鐙照花花正開何時酌我花前杯

滔滔白日如水流且復飲酒彈吳鉤侏儒飽死朔飢死悵望古昔多煩憂讀書東觀自吾分不爾射獵湘山頭吁嗟乎長吟躑躅滯江側欲往

不能歸不得

退思軒一

王

退思軒詩集卷第一

退思軒詩集卷第二

長沙張百熙著 門人汾陽王式通校

桃源望隔江諸山

綠蘿四十三福地靈氣下繞桃花溪扁舟流水
夕渺渺芳草古洞春萋萋北望衆壑但煙霧南
征幾年無鼓鼙問津儻得最幽處便擬結茆辭
故棲

辰龍關

萬山晴翠撲空來鳥道盤紆一綫開北向峰巒
千樹合南征兵甲幾人迴援糧無路愁行跡貌
虎當關倚將才邊徼風雲銷浩劫中原天地有
餘哀

自玉屏赴貴陽道中感述一首

飛鳥無安巢游子感異鄉南征指牂牁道路阻
且長山行百艱險曉夕紛徬徨煙昏號斷援月
黑叫鵝鴿我馬日以瘠我僕其能強憂來一長
歎風動天蒼蒼蕭條玉屏縣門戶開蠻疆自從
咸同來逆苗肆披猖浩蕩千里中白骨悲沙場
官私悉破壞無有完城隍郡邑萬家室雞犬豬
牛羊殺戮不一存存者皆流亡荆棘塞衢路但

多豺與狼

朝廷赫中興教令讐遐荒將士稟

天威百戰清夜郎有司治蕪穢斬伐通周行稍
稍見人煙日集農工商廿年苦兵事沴氣乖陰
陽歲久疫始流人事頗不祥吾聞羅施地奧壤
古金湯滇蜀楚粵聞陝隘天所藏如何經喪亂
咫尺生銛鋌蠢茲推髻徒反側故不常召釁亦
有端官吏吁弗良覆車炯前鑒守土應毋忘闕
達

堯舜朝庶職勤劬勩南陲扼邊要一一需保障

譬木慎滋培剪伐生意戕養禾去螟螣勿使嘉
禾傷大法斯小廉政弊民迺妨昭哉理亂原敢
告百冠裳

甲秀樓鐵柱歌

鐵柱二皆鑄平苗兵器爲之一雍正
朝西林鄂文端所建一則嘉慶時勒
侯所踵置也

倚樓飛柱截雲平銷盡蠻天十萬兵想見六師
齊解甲一時新築受降城

聞笛

秋城月小銀河夕孤館鐙昏正愁寂萬瓦沈沈
露氣深誰家冷撼高樓笛微風低度得纖妙宛
轉悠揚意如惜此意分明入倚欄相思何處不
關山銷魂莫按楊枝曲瘦盡離人鏡裏顏

怡園白鶴歌和高七觀答時觀答所如
不合欲歸未果因以諷之

有鶴有鶴號仙禽瘦抱病骨棲秋陰怡園竹實
豈不美引跂寥廓生遠心吁嗟豈乏凌雲翅悄
步迎人儼愁思唳月宵深竟誰識干霄路闊無
由致鶴兮鶴兮爾胡不高舉丹山頭爾胡不獨

退思軒二

三

守梅花國何爲垂翼入邊徼毛羽離褻少顏色
主人義重雖足憑觀者側目還堪憎歸來白鶴
兮風煙窈冥烏蠻險惡兮不可久停

綦江道中

地阻蠶叢險雲深驛路偏雨中時見日山外欲
無天斷岸江橫折崩崖樹倒懸向聞蠻井絡愁
絕馬蹄前

浮圖關

江流浩西來山勢競東向雄關俯斷壁郡國見
傑壯巴渝古形勝華實九州抗高影控岷峨蒼

蒼鬱相望風雲變今古氣與厚土王如何顧盼
閒遠色帶悽愴頗聞互市議丙子二年英人請
給重慶大理各馬
頭爲互市地
廷議許之慮使犬羊放尊攘昔賢烈大義日
凋喪衿喉此天險勒石感名將關左側巖石勒
楊果勇孽窠書
安得百虎臣起作百川障天意黯蒼茫攬轡獨
惆悵

丁穉璜宮保丈節署讌集談次及山陝
近事感賦二章即呈丁丈

觥觥宮保秉壯猷森列兵衛擁八騶開軒坐我
爲我語魯酒不解蒼生憂去年山東多難民今

退思軒二

四

年山西人食人安得輸糧太原道五百萬人同
一飽

北風北來鴈南飛哀鳴四野將安歸黃狐白晝
入人室涇陽幾日天無輝陝西大饑涇陽叛
勇脅流民爲亂葭

萌關頭雲氣惡遠控褒斜連劍閣官軍慎莫疏
邊防川北亦復嗟年荒

北鴈

燕晉山河接大梁隴雲川樹黯蒼蒼憑誰問取
來時路幾處人家有稻粱

西風吹徧十神州孤影蕭條入暮愁嘹唳莫辭

關塞遠東南猶有幾分秋

題畫

三徑松杉合疏煙隔翠微村居無客至一一掩柴扉

即此足泉石窅然秋樹陰相看無限意不必入山深

巉巖落空翠暮色掩孤墅煙樹不見人如聞塔鈴語

老樹擎空雲似墨龍蛇倒垂太陰黑倚閣凭窗如有人日傍蒼山看松色

惠陵

北伐鴻圖鬱東征王氣終三分有巴蜀一代此英雄鳥嘯山光靜龍飛漢業空惟餘墓門樹車蓋影童童

武侯祠

沃野走千里險塞山盡碧森然出祠宇瞻眺赫且旄武侯天人姿巾扇儼夙昔方其誦梁父躬耕樂棲息能令蜀先帝三顧屈前席遠哉隆中對決策跨荆益炎精邁衰季盡瘁死社稷向使星弗沈長驅氣逾激中原勢可復北向那足敵

我來薦蘋藻望古黯心怒松柏護飛梁風雲鬱高壁相依漢陵廟祠前為昭烈廟右為惠陵靈爽實馮翼公乎去千載英采頗未寂天威懾蠻夷豈不視人力柄國尚嚴厲不以衆論易因嗟後人治寬緩百弊積安得起九原拯茲民困亟巧推牛馬製勇捍虎狼逼坐使六合清纖翳舉蕩滌再拜公不聞潛焉淚霑臆

江城

匹馬閒關入蜀行萬山秋氣浩縱橫長鑣故國黃精少短褐新交白眼輕念到流民生已幸讀

來

恩詔涕先傾江城夜夜無安枕夢裏關河有哭聲

訪籌邊樓遺址有作

成都天府國地勢開鴻蒙南望跨黔滇北眺秦隴通瀕洞夔門西浩蕩鴉隴東時代有遷變山川今昔同往者唐德衰海宇紛兵戎吐蕃南詔閒日夕愁狼烽贊皇拜朝命仗節規蠶叢構茲百尺樓截業嚴城中圖寫蜀形勝極邊諸要衝置之四座隅豁此千里胸籌防葺堡障儲糧修

戰攻苦心制蠻夷豈曰非英雄當其登陟時俯視青濛濛壯氣一以動慘澹回天風舊事錦水流荒址斜陽紅不見古時人蕭條樓影空

謁少陵先生草堂兼展陸放翁遺像

兵甲乾坤隘詩歌歲月新如公老愛國為客苦依人感激宣光業艱難稷契身浣花溪上路一望一霑巾

成都舊茅屋遺構識幽棲亭閣地俱古江山風始淒百花一潭近萬竹四松齊入門四松在步也不見杜陵叟夕陽空鳥啼

退思軒二

七

配食劍南老始聞嘉慶朝嘉慶中蜀人始議以放翁配饗工部可憐心激壯猶見髮飄蕭舊國東歸晚中原北望遙英靈定何在杯酒一相招

再過草堂弔杜陸兩先生感賦一首

幕府棲遲老病侵一官參議感浮沈孤忠不忘蒙塵耻萬死難銷報國心異代山河餘夕照高秋祠宇動哀吟如何蒼莽中原氣擾擾干戈自古今

贈鶴籌太守即題其壯游詩草

識子萬人海秋霄一羽翰幾成交臂失轉覺賞

心難江上歲月晚酒邊風雨寒壯游詩好在真見骨珊珊

巴部

巴部為古西南夷境國朝籍其地

置土官以控馭之然數反復為邊患

蜀之馬邊雷波我邊越舊四廳滇之

永善諸縣皆受害無虛歲丁丑春丁

宮保總督四川檄周觀察振瑞李提

督培椿進規夷巢自春徂秋采入其

阻夷酋率其眾先後詣軍門請降推

退思軒二

八

牛歌血誓不復叛論者謂邊患庶幾

稍衰云

奉使虛傳馬長卿

王師今見渡瀘行懸軍盛夏無絺葛累歲窮邊

有甲兵密箐黯叢天際影秋笳淒入雪中聲夷地

萬山叢雜深箐蔽天八艱難大渡河南路聞道

推牛已乞盟

書感

貢縻豈是周西旅市馬何勞漢大宛未信梯航

通絕域但令珠玉走中原山橫玉壘淒無色江

合金沙慘不喧寂寞巫岷羈客意朔風吹淚入啼猿

大佛巖

東望大江口峭壁橫天青中有千仞巖闌闌鏜翠屏不知始何年狀此跣趺形低眉看塵海舉頂摩明星篙師誇勝蹟語我古佛靈奈何春夏交江漲石腳平怒濤莽春撞聲鬬千雷霆舟行駭且恐命與蛟龍爭往往歎顛覆或有不得生我佛大慈悲那不扶危傾頑石豈解言煙波空窈冥

退思軒上

九

嘉陵道中

天然金碧點蠶叢勝事憑誰說大同一日舟行三百里祇疑身在畫圖中

市橋

我家山中雙橘林秋來結實如黃金客遊道遠那得食泥土汗腸塵滿襟阿奴市之自村谷啖我忽如餐露菊徑思持此向風塵涼徧炎炎貴人腹炎涼異情難可知霜重且保瀟湘姿清香貢入蓬萊殿莫忘寒山晚晚時

書夢

昨夜

王師大合圍驍騰萬馬盡駢駢八方草木森兵氣一震雷霆壯

國威天上喜看飛將落陣前生繫左賢歸濤聲捲地驚殘夢孤艇鐙昏百事非

晚泊

道路古三巴孤村倚岸斜地形邊石峻人語趁墟譁風雪遲歸雁江山起暮鴉平生疏野性飄泊負煙霞

野寺

退思軒上

十

野寺荒山路松篁一徑青禪樓出塵垢人氣逼精靈小坐隨簾席幽探且竹亭殘陽興不淺直擬住巖局

懷郭侍郎師倫敦

絕域無春色朝陰定夕霏慎持天使節莫枉漢臣威社稷關輕重傳聞有是非風濤七萬里皓首幾時歸

懷吳孝廉西域

忽有封侯想飄零更出關風沙莽戈壁雨雪度天山兵氣縱橫裏詩心慘澹閒短衣隨李廣何

日勒銘還

白帝城謁昭烈廟

澹日頽雲晚蕭颯蒼莽荆榛見荒堞漢家寂寞
千載餘一片遺墟壯夔峽憶昔先主師東征七
百里路紛連營獍亭折辱亦天意夜遁乃入公
孫城永安舊事難重問玉殿空山豁幽悶躍馬
全荒割據心啼鵲尚帶偏安恨君不見建業還
都王氣銷樓船直搗金陵潮吳宮花草黯春色
祇今故壘生寒飆又不見阿瞞漢賊傾天下末
路分香淚空瀉一代英雄讓使君漳河鏹盡銅
臺瓦成敗三分跡已非獨留祠廟鎮崔嵬年年
灩澦灘前水嗚咽東流更不回

灩澦

鬱律雙崖日氣昏中流峭色鎖夔門秦鞭不到
鼉鼉橫禹鑿初開象馬尊翠石孤標懸地脈白
波終古撼雲根我來飛渡瞿塘險天意神功孰
與論

峽風歎二首

前有長蛟後虎豹嗥峽江東流陰風怒號昭昭
白日晝若暝飛鳥絕跡愁猿猱孤舟瑟縮不可

以徑渡使我四顧心煩勞

有劍在囊有酒在壺仰天長謠聲單影孤北風
爾何爲曷不爲我吹海枯江干茅屋得四五上
有凍鳥飢啼烏揚沙走石不爾止慎勿摧檐折
雷破我窮民居

神女廟

幽贊天人事雲華功德敷疏流役神鬼弭節下
荆巫遂殿仙風渺荒臺莫雨無如看控鸞馭瞬
息百靈扶

三峽舟中雜詠八首

輕撓造幽邃黯黯江天深不知山色高轉訝坤
軸沈恢詭阻人寰日華淪太陰茲行遘奇境未
枉辭故林旁眺斬龍臺窅然巖氣森

險異不可狀萬壑爭崔嵬崖傾鐵色殘石折波
面迴往昔控舟師鎖峽橫江開至今烽火氣化
作青燐飛功名亦有時龍驤安在哉

山川自太古灝氣鍾渾噩天工擅開闢險絕鬼
斧斲瓦棺蒼翠閒突兀慘不剝有時露光怪白
晝走風電仰睇生遠愁峰巒起芒角

陰巖萬象肅夜氣噓龍淵仰首觀列星炯然光

在天徑思躡千仞駕鶴攀飛仙相從拾瑤草羽
化探真詮安能自世閒局束空百年

陰陽無停態俄頃勢千百雲盤鳥道危石偏人
境窄乾坤一顧迴楚蜀兩界圻稍西見荒縣城
郭黯無色亟爲起凋殘誰任斯民責

凜凜奇氣蟠步步幽賞慙江空不容唾山翠仰
承睫人言倚天劍倒掛蛟龍篴往往見兵書風
翻帶秋葉恍惚難可憑煙霏浸寒碇

危巒倚天半凍影雪霰積萬色森怪變直拔不
稍抑青玉漱寒泉綠蔓垂絕壁穴居穿石竇遠

退思軒二

七

想疑古昔悵望生白雲樵歌日將夕

蜿蜒七百里不斷山嶺臨江睠來途高下森
石角夷陵橫楚境形勝非小弱維荆及衡陽遠
勢互繚邈吾當理歸楫神區望南嶽

歸述

遠風吹行衣飄蕩向里門里居在何許古木蒼
崖昏柴扉傍山開日夕收雞豚老父喜我歸開
顏命清樽兄弟喜我歸笑語同春溫怡然到妻
子晚食羅盤飧蔬筍亦云佳一飽甯更論予生
屬多難盜賊彌乾坤六齡邁干戈處處湘水濱

七齡永明邑趨庭奉雙親倉卒鼙鼓來徒跣驚
逃奔巉巖始何代鬼斧鑿雲根豁舒腹中虛跼
伏且幸存身危出豺虎轉念傷精魂竭來踰十
霜局踣江上村微生綴高厚兵事傳紛紜金陵
狐鼠穴

王師若雲屯數省東南區百戰湘淮軍上憑

國威福次第清妖氛燕齊逮晉豫陝粵蜀與閩
甘涼並滇黔烽火時紛紛掃盪萬餘里一一天
戈振再開王會圖瑞氣占細縕賤子獨湖外俯
仰泥塗身林無蜚鴻翮池有涸鮒鱗途窮荷天

退思軒二

七

慈起家蒙

國恩釋褐附朝籍備貢文學臣永歎長逝母松
楸已高墳悲痛及今茲莫慰心劬勤撫膺夜中
泣涕淚緣衣巾方我少小時讀書氣嶙峋常懷
四海志放眼橫八垠如何負平生盛歲愁風塵
幽并地畿輔遠連遼海濱壯觀始朔方匹馬徂
天津扼險幾雄鎮古北旅順分居庸紫荆關山
海自昔聞重臣秉節鉞水陸宜周巡控制華與
夷忠蓋酬

紫宸南行渡滹沱蕭條冰雪辰何處蕪菁亭黃

沙馬駢荒臺弔銅雀奸雄誰與倫太息漢道衰駕馭無其人馳驅大梁道落日黃河渾夷門訪侯嬴屠市空雕輪歸途指江漢形勝窺襄樊壯哉南北資用武古所均坐失偏霸業劉琮何足云峴山憶羊杜感激平吳勲龍岡起英風鹿門慕隱淪是時中冬月張帆日晴熏玉笛黃鶴樓鄂渚波鱗皴遂泛重湖水還度五嶺雲羊城勢雄傑珠江綠雲濤尉佗信人豪上書臣漢文豈謂蠻夷長不識天子尊遐眎有餘思淹留屢兼旬迂迴返京國客路車轡駟跨步跨山東覽

退思軒上

五

古無虛晨都邑鬱相望蹤跡難具陳前年下姑蘇旅食秋風蒨杭州酒正熟打槩西湖濬淮揚意茫茫嘉湖走跋跋放浪吳越境憑眺懷千春揚舲沂洪流消搖此中原可憐戎馬場往往飛青燐去年夜郎域瘴區悼生民想見謫宦悲蒿目愴心神慨焉舍之去西望趨涪岷攬轡徑巴渝弭節蓉城闔茲邦號天府四境資屏藩沃衍土壤寬材物庶且繁經營得時彥不憚法令煩乃知昔賢達未有辭勞辛崇祠武鄉侯鞠躬見貞純松柏舊陵廟尚與先主鄰草堂杜公宅竹

翠留霜筠人言風雨宵如聞苦吟呻浩歌騰前代往蹟紛愁顰遑問割據才因緣世艱屯掉頭迴東逝夔府天斜曛寂寞永安宮遺恨曹劉孫回旋入巫峽連山石玢璘娟妙十二峰縹緲疑仙真重灘迅奔雷洶若雲夢吞夷陵到咫尺牙錯通荆鄖閒道武溪深孤棕駛還轅興極汗漫遊息轍茲田園田園故自好骨肉情歡欣藹藹一室內香滿蘭荃蓀顧慙山澤姿忝竊預薦紳暫將赴朝列抗手攀

退思軒上

六

象日以新幾年復來還吾當老桑粉薜蘿臥幽壑小隱麋鹿羣青松知我懷爲我枝輪困白雲知我懷證我世外因功名滿流輩未可輕鋤耘不見煙際鷗浩蕩誰能馴

懷

送仲兄之郴州時予亦將北上詩以寫

山氣妨多病茲行恐未安孤雲度湘遠五嶺到郴寒藥裹攜都好儒冠悔亦難無爲將百慮慎疾勉加餐

蕭瑟湘南去送君江上舟我行當北發江水獨

東流握手難爲別，亂帆無限愁垂楊。吾怨汝遮斷望湘樓。

江豚行

江豚吹風風怒號，江翻岸倒白浪高。長年束手慘無色，大舟小舟行不得。疾霆驟雨傾滂沱，勢走鯨鰐掀蛟鼉。百怪洶洶誰敢訶，豚汝之族何其多。豚乎豚乎奈汝何。

秋花

絕域何年種，開成爛漫花。無嫌色嫵媚，轉覺氣清華。小雨霏霏溼西風，故故斜便持杯酒賞真。

退思軒二

七

作野人家

哭仲兄

我生懷百憂，世變亦多端。顧瞻同體親，相恃每自寬。豈期百年事，一旦成悲酸。長沙三月天，向晚風正寒。青山帶帆影，綠水波漫漫。君行赴郴州，君意悄不歡。我時在里門，送君河之干。甯知生離日，遂作死別看。嗚呼君已矣，我淚紛沱瀾。吾家世詩書，清白貧亦好。與君少年時，文字共搜討。澹然輕富貴，亮節期永保。趨庭永州郡，更歷兵亂早。餘生漏鋒鏑，盡室色枯槁。丁年喪慈

母涕泣素衣縞，愴此夙昔懷。愁來不能掃，君今復安往。不得同耄老，落日望故鄉。心傷怒如擣，家貧困轉徙。生事苦不支，葛灣有敝廬。數椽君手治，驅奴督工作。伐土焚茆茨，窈窕溪山中。卜宅奄在茲，老親日衰白。杖屨從棲遲，嗟予羈一官，不得慰所思。惟君及伯子，勉勉相扶持。如何長棄捐，觀化與世辭。招魂一痛哭，已矣其何詞。

夜坐誦程伯翰擬古詩有觸賦此即東

伯翰

九街車馬如水流，古寺寂寞春徂秋。槐花落盡

退思軒二

七

綠陰晚棲鳥不鳴，禪院幽掃除一室。足坐嘯把卷，偶復窮冥搜。長沙程君雋，無偶意態蕭然頗。吾厚相逢抵掌快，傾吐排闥時來不須叩。談詩縱橫有深意，下筆能追古人後。示我擬古詩八章，撫事感激摧中腸。長波鯨鮪動遼海，西風牛馬號邊牆。

聖朝寬大不耀武，養晦待舉悲

先皇長吟未息聲。淚下黑月黯淡青，鐙涼鄉心況復念親懿。關河霜露懷高堂，霸棲我亦正愁絕。獨語寒窗暗幽咽，讀書早歲志不薄。無補清

時愧朝列與君相期天下平八荒重譯來
王庭私憂耿耿向霄漢妖氣夜指攬槍星

從弟沅蓀自塞外入都喜賦二首

聞汝艱難出塞行儒冠長揖漢家營風霜短策
調邊騎星火飛書料敵情斷磧無煙通朔漠流
沙如海莽西征懸知夜夜還鄉夢惱煞秋笳十
萬兵

帳下不諧兵子語拂衣寥落向長安心隨

帝闕風光暖身帶天山雪影寒愁至漫揮羈客
淚飢來聊共腐儒餐夜深燒燭論邊事短褐鐫

退思軒二

九

前把劍看

病中得李幼梅杭州書

故人別後幾寒暑迢遞關河有報書黯黯暮雲
懷李白蕭蕭秋雨病相如槐陰古屋城南寺柳
色高樓湖上居等是舊游忘不得夢中無路渺
愁予

送沅蓀赴平山

青青楊柳枝依依不堪折落落素心人相逢更
相別相別相逢難可知白雲飄忽無定時亂鴉
聲裏千門曙送君匹馬滹沱去長鋏隨身莫怨

嗟舊游我亦慣天涯君到房山儻相憶望京樓
上望京華

古風一首為某侍御作

桐梧別院愁湘娥援琴為君發清歌一彈再彈
音響和三彈慷慨聲淚多華堂沈沈月生波粉
繡明鏡雙脩蛾烏啼奈此霜露何

大行孝貞顯皇后輓詩

嫺廟諧金籥娥臺闕玉塵

徽流漢明德

嫩軼宋宣仁

退思軒二

手

哀詔傷

西聖

慈暉蔭

北辰巍巍

大孝治灑涕望

沖人

送黃觀虞前輩赴

普祥峪陵差一首

選禮敷靈祉威儀漢太常衣冠奉

神主劍烏慟

先皇己卯春百熙派書惠陵神牌以我昔悽咽知君今黯傷
定東陵遠近松柏鬱蒼蒼

送鄭荇汀同年赴蘭州一首

京師冠蓋地車馬若雲流我友故鄉來淹忽歲
已秋昨宵告我別握手不可留僕夫戒晨裝攬
轡逝西游國家重邊要西陲拱神州險控嘉峪
關遠跨崑崙邱天心縱狡寇萬里森戈矛殺人
如亂麻燐火生觸骸元臣奉

神武忠勇殄逆酋故地悉已平回疆還見收濟
濟大官府蕭畫恢壯猷君今赴皋蘭盡力資運

退思軒二

主

籌長揖謁大府為語

君恩優察吏猛濟寬庶見職事修誠心集眾思
桑土塵綢繆

嚴旨取兵馬

時嚴旨調取各直省兵馬數目

成額吁可求練

士貴精強簡軍戒虛浮如山稟節制氣與邊風
道嘉謨報

天子無貽西顧憂

別意四首

別夢依依在家遙那得歸秋心逐秋鴈祇是向
南飛

故國幾千里山高水又波如何風更雨偏向晚
來多

歲歲年年客朝朝暮暮情鄉心似明月旋滅復
旋生

望遠莫登臺銷愁莫舉杯將愁比東海一日一
潮來

聞環欽入滇卻寄

見說依滇海王郎磊落才身隨一劍在氣壓萬
山開塞雨鄉心折邊風戍角哀昆明有舟楫資
爾巨川材

退思軒二

主

秋風

秋風動天地一夜滿長安歸夢不知遠故園碓
杵寒愁心獨蕭瑟生事且艱難忽念邊城戍黃
沙雪擁鞍

退思軒詩集卷第二

退思軒詩集卷第三

長沙張百熙著 門人汾陽王式通校

雙槐行示蘇主事栗堂

古寺雙槐如老龍偃蹇盤屈森擎空蒼根裂土
瘳蛟蟄碧幹騰蚪多烈風南窪兩樹露鱗爪似
有神物蟠當中眼前不得併奇絕對此已與精
靈通我生山林好幽寂老屋陰森雜櫨櫟沈吟
大木須時會鬱鬱干霄氣無敵一朝翦伐辭故
山十年徙置京塵閒用非其材耿內愧抱影且
復依禪關君乎何爲動遙感撫髀傷時無好顏

退思軒主

談深燭燼秋雨殘槐龍颯沓更將闌拔刀起舞
莫長歎君不見松柏後彫禁歲寒

題郭筠仙先生撫粵時荔灣話別圖一

首

孤忠滄海底橫流開府勲名舊廣州老去丹心
存漢節歸來白髮有扁舟
主恩民病天涯淚寒日西風嶽麓秋莫道荔枝
灣畔別波濤如雪使人愁

君貽伯翰見過

金莖不解孤懷渴玉樹欣攀二妙姿夢裏瀟湘

共清淺愁中京國各淹遲談深燭影低窗甕秋
老霜威入鬢絲龍氣鬱蟠雙劍在豪情相望夜
闌時

萬柳堂

柳色秋凋夕吹哀畫堂蕭寂暮鴉回九門日月
蒼茫去

雙闕風雲浩蕩來舊說平津開臥閣爭傳郭隗
有高臺祗今故事無人問愛士虛煩宰相才

寄張樵野觀察

蔭桓 濟南

前年忝持節攬轡渡河流齊魯風斯古離華天

退思軒主

十

正秋逢君一傾吐百尺有高樓別路還寥闊伊
人不可求

海氣紛千變誰從斷六鰲艱難用舟楫浩蕩怯
波濤日月秦碑古風霜漢碣高山東形勝地控
制倚賢豪

聞道提戈出防秋自請纓將才龍變化士氣虎
縱橫白羽軍中檄黃沙海上兵韉刀堪一騁壯
志此長城

夙昔高談意森然見鏌鋌飛分兩鴻鵠蟄起一
龍蛇文壘摩開府詩壇拜浣花齊東有來雁好

爲寄京華

九日

秋花瘦盡柳毵毵風雨鴿原思不堪故國茱萸
休徧插可憐天北望天南

仗馬

鳳闕松棱金雀飛森然仗馬自駢駢可無

嚴旨幾門籍亦有封章達

禁闈符節更申周室法冠裳同懍漢廷威白頭

太史窺天象入夜妖星近紫微

靈臺

退思軒

堯母靈臺松柏新經營福壤閔千春

乘輿暫輟西都禮

寢廟先安東陛神他日

御牀悲漢帝當年殿觀

宣仁百官忠恪真應勉

遺詔長留淚滿巾

華堂

臂鷹盤馬氣非常少小身親從武皇設醴受詩
無夏屋遺簪滅燭有華堂豈宜漢法繩梁苑但
頌周家貢越裳寶玦珊瑚應記取早時烏啄感

胡霜

漢相

漢相威棱壯本朝入關笳鼓馬蕭蕭舟凌日月
榮光滿履動星辰夜氣銷退老深心推召奭和
衷嘉德感皋陶祇今萬里空羣盜但取孤忠領
百僚

腐儒

雨露雷霆化不私腐儒流涕感明時九秋援狄
靈均怨六合梟鸞杜甫詩星拱北辰臨
玉闕雲窺西母下瑤池諸君嶽嶽中朝望願把

退思軒

四

公忠答

聖慈

南國

袞袞聲華自鼎臺建牙須仗濟時才雲中鼓角
樓船滿江上旌旗幕府開早是東山輕出處好
從南國賦歸來庵居不見英雄老祇乞閒身向
草萊

海上

射虎將軍百戰場中興功業亦堂堂橫戈再起
威名老洗甲三秋殺氣涼忍說金錢糜內帑頗

聞意步謗歸裝精忠海上須千古心折當年異姓王

十洲

十洲神異漢臣書喜說浮槎犯斗墟索驥但圖西極馬化鯢爭起北冥魚眼穿禹甸朝宗日淚灑

堯階舞羽初不解縱橫建奇策祇應歸夢到蓬廬

雪中同王祭酒

先謙

瞿學士

鴻機

唐給

事樹楠

孫編脩

宗穀

黃檢討

自元

徐

退思軒主

五

貞外

樹鈞

龔主事

振湘

天甯寺集餞

送相國恪靖侯赴江南制府

相國

帝股肱持達自

文廟用兵九天上轉戰削羣盜聲名紛歲蕤動

爵邁方邵來朝古諸侯正色典樞要再疏乞閒

散溫語加慰勞

皇心眷南服日月不私照咨公鎮江表鎖鑰此

堂奧狡夷爾何為雄才敵能料舟師橫鐵艦訓

練兵甲耀飛騰士熊羆縱橫韜虎豹首尾聯北

洋吭背揜邊徼當令世清謐威德遠丕冒首塗發

皇邑車騎屏前導祥雲曉紛霏忠潔實感召諒

哉玉芝瑞

今年春公邸第產芝如玉

嘉貺錫老耄臨觴賦斯

篇且酌亦且禱

題話別圖應孫子與秀才

孫郎磊落身七尺酒後酣歌出金石抵掌論交幾年少豪情擊斷珊瑚赤春申江頭生暮潮布帆渡海秋蕭蕭離愁一夕和潮長雨後風前總不銷

退思軒主

濟南使院八詠

四照樓

濟南山水窟窈窕煙波中秀色蒼然來亂落青

芙蓉層樓拓遐矚風雲連海岱懷古一憑欄輕

寒襲襟帶

小小滄浪

昔年客姑蘇訪古滄浪亭古人不可見暮雨寒

山青今年住明湖官齋傍煙水悵然懷舊遊斜

陽渺千里

石帆

儂家湘水曲日汎沙棠舟張帆不用槳打槳驚
眠鷗別來今幾年秋蓬倦行跡不耐逐蓬飛我
儂心匪石

海棠汧

珍葩蔭芳沼曲折雕欄千年年燒燭時粉暈鮫
綃寒春陰晚霏霏溼透啼猩血不見捲簾人繁
花豔如雪

濯纓橋

紅橋四五尺低影界寒綠秋風生水紋微涼蕩
心曲濯纓莫濯衣中有京塵縹緲留將舊來跡認

退思軒三

七

取長安時

秋聲館

黃河裂地軸十室九傾覆西風若波濤勢欲撼
我屋我屋安足惜我心悄以悽噉噉鴻雁哀瑟
縮悲窮黎

古槐書屋

槐龍森古姿風雨欲飛去把卷思古人徘徊對
孤樹樹老屋鼓側蕭蕭衾枕秋自憐骨相薄不
敢夢封侯

鐘樓

飛樓鬱峻增不見前朝寺危梯斷人跡昏黑走
精魅橫風海上至萬象秋蕭森安得鳴洪鐘一
警天地心

憶明湖荷花

蓮葉碧田田明湖影翠煙相期渺秋水相思成
隔年隔年愁不見展轉他鄉縣展轉奈花何好
風花正多

雨中同諸公登千佛山

山色竊窺蒼煙中石欄巖磴吟望同神龍驅雨
黯白晝大鳥摩天盤黑風俯視一氣莽蕭肅坐

退思軒三

八

待二儀開晦蒙眼前哀雁救不得誰與手障黃
河東

遊泰山三首

岱宗蘊神秀巨鎮維天根自從造化來元氣盤
網緼吾聞帝出震奠此鼇負坤燔柴籲靈貺秩
祀茲山尊雲興沛元功不以膚寸論六合豈有
殊敢忘生物恩嗚呼古神皋地軸通八垠徑思
小天下一埽煙塵昏真宰不可求詆蕩窺天門
封禪七二代輦道青天荒樹石祖嬴秦紀功臻
漢唐神壇瘞金簡玉策何輝煌祇今巖壑閒勝

蹟凋風霜

國家昔巡狩肆觀臨東方封山禮紛綸鉅典邁
百王六飛頓瑤轡萬騎隨騰驤

御帳空翠中雲氣紛龍翔維時道全盛四裔皆
梯航頒瑞荷神休海清波不揚小臣述

功德感事心惶惶駐馬望中原山川結蒼茫

捫崖路盤紆斗峻逼霄嵒石骨莽奔崩危梯裊
相絡飛泉界寒碧玉色凍可鑿蒼松太古姿晴
雪紛雨落瑤花近堪拾霜巖凌如削維天闕靈
竒縹緲仙境拓河山入指顧煙點綴城郭但有

退恩軒

九

風雲通翻愁地維薄勢當凌絕頂東眺海一勺
扶桑見開霽腥穢洗蛟鰐天風忽飄蕩吹袂下
雲壑時會不我逢竒情鬱磅礴

蘭陵道中

地帶滄溟闊山隨驛路開風塵催夢斷冰雪逼
春來宦拙存孤尚時艱惕小才駢駢真靡及無
補愧涓埃

發沂州

北風吹海雲一夜莽飛雪山川皓無際厚地氣
凜冽迤邐琅邪城蕭條季冬節清沂淺盈尺凍

合輦不裂我行蹤冰霰我馬病欲蹶官程豈辭
瘁往事略可說山東昔喪亂茲土實淪沒殺氣
慘相纏艱難殄妖蜚長河繞荒郭有水但流血
到今沙石中奔濤尚鳴咽遺趾近繁庶撫字力
誰竭冬寒弭怨咨亮矣仗時傑睇茲土膏潤喜
見麥苗茁年豐民氣活盜賊敢芽孽蒿目野跣
踏鬱此肝肺熱

由泰安至張夏書驛館壁

春日驛亭柳絲絲拂去鞭如何攬征轡雨雪又
殘年昨夢拾瑤草言登泰嶽巔碧霞君不見騎

退恩軒

十

鶴下南天

越南貢使阮恂叔雲麓唱和詩卷為同
年李幼梅觀察題

萬里河山銅柱標越裳琛賁使車遙妖星豈意
臨藩服師雨還須倚

聖朝莫使內侵周玃狁可能重起霍嫖姚等閒
詩酒從寥落感事知君恨未消

陌上桑三十二首

鬱鬱陌上桑娥娥軍士妻盈盈淚痕溼掩袖向
人號

鬱鬱陌上桑依依亭畔柳君行赴邊關使妾空房守

鬱鬱陌上桑鋒鋒檐下鈴早知怕兵事前歲有妖星

鬱鬱陌上桑萋萋路傍草不怨立功遲但願歸來早

鬱鬱陌上桑燦燦腰閒佩且復立斯須前頭莽關塞

鬱鬱陌上桑采采牆陰薺辛苦人不知自愛君身體

鬱鬱陌上桑裊裊手中鞭千巖萬壑裏君行何處邊

鬱鬱陌上桑隱隱雲中巘落日不見君心如轆轤轉

鬱鬱陌上桑嫋嫋釵頭鳳那得便相逢萬一今宵夢

鬱鬱陌上桑瑟瑟牀中被思量夢見君輾轉不成寐

鬱鬱陌上桑灼灼枝頭花明朝明鏡裏褪盡臉邊霞

退思軒三

土

鬱鬱陌上桑嘒嘒梁閒燕意欲寄君書何鄉復何縣

鬱鬱陌上桑莽莽雲閒蝶不曉強弱形但盼紅旗捷

鬱鬱陌上桑粼粼山下車持糧能幾日火速取軍儲

鬱鬱陌上桑飄飄雲外鶴寒莫到君邊連朝北風惡

鬱鬱陌上桑促促軍中裝後軍君莫羨主將是同鄉

鬱鬱陌上桑悠悠關外笛身手定誰強邊風響鳴鐃

鬱鬱陌上桑交交花底鶯思君祝君好射得海中鯨

鬱鬱陌上桑望望車中械借問廣西師何如馬江敗

鬱鬱陌上桑濺濺崖下灘援軍到應早努力斬樓蘭

鬱鬱陌上桑沈沈月中杵春去又秋深離心奈何許

退思軒三

土

鬱鬱陌上桑去去門前驂傳聞諒山戰早晚定
安南

鬱鬱陌上桑怱怱塞下雪似說大軍行風吹帥
旗折

鬱鬱陌上桑離離山北薇同行多火伴白骨幾
人歸

鬱鬱陌上桑簇簇村西屋人言風雨中山精夜
來哭

鬱鬱陌上桑濛濛竹間爨錯應小姑言諒儂心
緒亂

退思軒主

主

鬱鬱陌上桑悽悽井邊汲忘却挽銀瓶多時倚
欄立

鬱鬱陌上桑寂寂花閒鳥欲問消息來軍情幾
人曉

鬱鬱陌上桑漠漠道傍塵長日樓頭望風來愁
殺人

鬱鬱陌上桑淦淦江干漲不見北來船一見一
惆悵

鬱鬱陌上桑冥冥煙際波教人怨邊塞何事喜
干戈

鬱鬱陌上桑厯厯橋邊柱忍死待君回塞裳淚
如雨

退思軒詩集卷第三

退思軒主

主

退思軒詩集卷第四

長沙張百熙著 門人汾陽王式通校

感述二十首

聖朝大無外萬國一共球遠陋秦三島全通漢
十洲時聞魏絳策不廢賈生憂滿目中原事滔
滔江海流

埽盪空羣盜煙塵萬里開還收使犬部廣築射
蛟臺

天子今神武

朝廷亟俊才長鯨爾何物公犯大波來

退思軒四

越裳我藩服典在職方司豈謂西戎釁翻勞

上國師干戈悲絕徼琛賫憶清時不有秦廷乞
孱王勢莫支

三策戰和守昌言有異同未宜疏

國計不在急邊功慘慘妖氛白荒荒夕氣紅乖
違五款約擾攘及兵戎

疆帥

君恩重邊才物望傾傳聞興化役潰退北甯兵
閩外伊誰責軍前法不輕尚留明慎意八議付
廷評

開府淮軍舊行營楚將多勞師懸瘴癘殺氣慘
兵戈材武巴圖魯驍騰曳落河幾時漢壯士真
見入關歌

風后宜雲陣蚩尤利鐵兵誰乘邊塞險自失諒
山城血戰期諸將心攻望遠征何因復西貢亟
為保王程

屢潰臨戎陣貔貅亦虎狼未應甘盜賊祇是苦
逃亡鼓角邊庭月戈矛絕塞霜揭竿憂不細草
竊可勝防

筭算無遺策金錢困大農

退思軒四

軫茲窮海戍減及

內廷供

宣室勞前席端門遲曉鐘艱難

勤政意袞職在夔龍

舊日共和政

恩逾晉鄭親頗聞災異免復此歲時新聽履趨

丹陛

垂衣扈

紫宸向來樞密使康濟望功人

斧鉞坐籌邊軍容北控燕操防漢水戰按試宋

車船

禁旅分屯日嚴兵入衛年何當外國服新制有全權

巨浸蛟鼉橫微生鹿豕羣心懸天北極淚盡海東雲永念愁兵氣高歌張酒軍山居迴幽僻風鶴颯紛紛

計失街亭敗胡來漢邑災不成誅馬謖虛擬逮王恢時局天難料邊防事可哀淒涼古形勝空有釣龍臺

島嶼茫茫界波濤洶洶秋共傳操鐵艦何以鞏

退思軒四

三

金甌宿將徵楊僕專征用武侯華夷此天險防禦要深謀

坐失基隆隘深虞淡水危張皇假旄節慘澹見旌麾大海中西勢全臺南北陞澎湖亦門戶扼險慎藩維

虜艦流真斷臺山據亦牢潛通木罌渡愁瞰鐵城高陷陣雲皆墨無衣風怒號雷霆鬪飛礮直欲鏟紅毛

傳聞寇普陀飄忽犯甯波真擬石填海終憂黃障河天心窮世變

國本在人和戰勝憑帷幄持籌近若何

八表何人略艱危到此時大軍龍陣在重地虎門支使者躬持節元臣病視師忠勤期共濟款答

宸慈

蕃將哥舒翰威名半段槍斯人尤矯矯有陣亦堂堂憂

國同毛土橫邊老鬢霜

王師資犄角併力埽天狼

祖德乾坤大

退思軒四

四

神功日月昭聲靈

九廟赫文軌八埏遙未墜中興業無忘

列聖朝東西

帝陵在爭盼五雲飄

客兵

召募疲今日騷然見客兵可無身報

國難得志成城飛檄移戎幕悲笳動漢營本殊山澤性况此裹糧征

陳守如麓雲仙館圖歌

我家嶽麓峰邊住雲白山青最深處綠蘿春罨

隔溪村黃葉秋，敝渡江樹一別家。山路幾千憑，誰筆妙寫林泉年時風雨懷。歸日窈窕鄉心墮，酒邊輸君韻事圖金碧別館玲瓏境幽僻。讀書人思翠軸裝題詩客許紅箋，擘聞道君家郴嶺西。蘇仙巖洞草萋萋，引春花繡官亭晚靈壽枝蟠石室齊魚絳。舊蹟書堂在絕學，濂溪擅千載流風泯泯正堪師。去日堂堂不相待，君乎歸隱意何如。閉戶談經有故居，臥遊休憶道林寺。蠹盡朱張講學書。

交歎

退思軒四

五

古交難可復，今交桃李春。桃李豈不妍，美好無常新。廣場盛冠蓋，華轂接雕輪。片言託肝膽，歡若平生親。暇日矢百年，恩紀難具陳。一朝成離異，兩情遂乖分。得失不足明，哀此薄終人。昔為膠中漆，今如委路塵。在天參與商，在地越與秦。雲雨有翻覆，四海誰依因。

送孫涵若東遊

飢驅真到汝東去，定何之。書劍雄心在，風霜瘝骨支。飄搖禁晚歲，歌哭慎危時。慘澹臨岐意，能堪別後思。

送舍弟嘯石入閩

塵勞汝命無甯歲，歲暮天寒更遠遊。閩海煙波懸萬里，楚江風雪下孤舟。讀書識字終何益，別婦拋兒不自由。我亦艱難多病日，鵲鴿沙晚思悠悠。

秋懷

一官疏野綴朝班，卅載銷沈損舊顏。款款妻孥數人在，依依邱壠幾時還。長安風雨愁中屋，故國煙霞夢裏山。欲寄秋心與南雁，亂雲如絮隔鄉關。

退思軒四

木

同年朱啓生侍御一新以言事改官賦

贈一首

抗言古有劉蕡策，流涕今誰賈傅書。主聖豈容無直諫，時艱曾與共長歔。螭頭夕拜孤臣疏，鷺羽朝零御史車。去就一官知不惜，蒼茫萬感復何如。

與李憲之方伯

嘉樂

談近事感賦即贈

驄馬威儀舊諫官，朱衣蒼佩鐵爲冠。躬逢聖主開言路，手寫流民動御鑾。回首十年成想像，盤胸五嶽起巉峿。祇今

災異憑誰說太息天人事百端

偶成

近傳

丹詔下雲霄

天語森嚴動百僚避道未聞桓典馬漏師應監

寺人貂鐵牌有訓垂

皇祖金鑑何書獻

聖朝撫事敢忘

初政美願規全盛纂

神堯

退思軒中

七

龍飛鳳舞

治垂衣

宮府深嚴日萬幾四海瘡痍民力盡

九重脩省諫書稀似聞工作煩

宸苑頗有凶荒達

帝畿附會災祥真不敢偶披前史一歎欷

九日飲樂椿園因憶去年重陽時與同

人遊長沙賈太傅故宅悵然有作

賈傅長沙有故居栖遲三楚傍三閭湘纍併入

離騷怨漢帝能容痛哭書秋草寒林空弔古去

年今日渺愁予如何

京闕西風裏坐覺蒼茫感未除

過蔡與循兄寺居

長安五城朝復昏古寺冷落城南根百年鼎鼎

不相待萬事悠悠難可論嗟老未老鏡中影欲

歸不歸湘上村祇應吾黨二三子早晚造君來

叩門

擬古宮詞

窈窕蛾眉選侍來掖庭秋色冷宮槐先朝故事

猶能說親見君王罷露臺

退思軒中

八

玉殿璇宮綺作寮軒車紫屬少臨朝上林不問

相如賦止有宮人誦洞簫

積慶圖成寫御屏天潢源派纂唐廷開元天子

真明主不注忠經注孝經

星象傳聞變不虛寧爰沈玉感河渠宮庭自是

關修省莫廢天官太史書

拜內尚書近御牀夜珠明月費平章昭儀去後

年華改撩亂風花說斷腸

漢宮官監奉宸游管領春風十二樓中旨不裁

神策使內人爭拜大長秋

小立瑤軒望五雲美人心事月三分喁喁鸚鵡
前頭語放出昭陽更不聞

小苑芙蓉水殿香水邊三十六雲廊輒輿曲折
行都徧不怕秋風怕夕陽

長日長門漏箭沈偶傳消息淚痕深白頭宮女
翻成慣冷卻宵來望主心

聽斷歌聲立冷苔宮嬪都在集靈臺淒涼別院
無言女羞負先皇一顧來

送俞陔譜大令成慶之官竹山

俞侯五十登玉堂偉然獻賦趨明光一朝失意

退思軒四

九

作縣尹色頗不憚神傍徨俞侯俞侯奈何許別
路秋風聞雁語行矣當爲出岫雲正有蒼生待
霖雨竹山之邑古上庸女媧遺廟西山中煩君
問取補天術寄我一開星斗胸

再贈陔譜

九月雁南翔迢迢向武昌懷歸阻岳鄂問俗別
荆襄行色菊花雨離情楓葉霜贈君期自勉史
傳有循良

抑園雜詩十二首

抑園在山東兗州道署西偏園小而

多石余視學時按試兗郡黃芝山觀

察大鶴嘗招飲於此憲之前輩備兵

之暇增置園景景系以詩偶就懸想

所及和爲短句十有二首

青芙蓉

秀色出天然玲瓏謝雕削萬古石華音無人見
開落

韻琴亭

琴韻瀉寒玉泠然山水青孤亭風雨中疑有蛟
龍聽

退思軒四

十

采香徑

香草亦云佳采之欲誰贈美人期不來冷落蘿
蕪徑

碧雲洞

龍去碧雲乾龍歸碧雲溼巖洞古蒼然雲深老
龍蟄

清涼窟

蕭蕭林壑美寂寂清涼境獨往不逢人坐冷斜
陽影

石鏡

巖空雨氣秋一鑑洗寒翠莫向鏡中窺塵顏易顛顚

花嶼蘭皋

小嶼媚晴花皋蘭亦荷靡采花當采蘭莫待秋風起

桃花坪

風前桃花笑雨後桃花泣殘日下寒坪無言伴花立

小匡廬

匡廬九疊屏一疊一痕青何日張雲錦蒼蒼向

小亭

十一

湛綠溪

朝向清溪汲暮向清溪浣溪水綠如油溶溶夜來滿

尋鶴磴

鶴飛何處尋孤磴碧蕭森獨立無人識寥寥萬里心

霽華臺

層臺延霽色裙屐愜歡賞落日抱琴來還期月華上

湘祠和黃再同編修國瑾詩韻

楚山衡嶽水洞庭閒氣鬱蒼蒼霄青降神周室誕申甫告功泰岱輝云亭

帝眷四海不窮武天甄羣材如有型崇祠俯仰感忠義鏤鼎銘庸來者聽徐副都述湘軍事略勒銘於鼎

和黃麓泉戶部唐湘軒雅集之作

酒讌共賞湘祠秋寄舫應同湘上游梯雲一取古時月吹管三更何處樓西江小社得君好時君

主小西江詩社東軒新詩開我愁吟餘撫枕發清嘯破睡不須茶滿甌

送孫君異點隨使日本

十一

孫郎豪士富文采落拓卑官壯心在秋風握手告我行匣劍囊書向東海東海使者維黎公得

君喜君才且雄清時再捧鸞鳳詔黎先後再充日使逸氣共指鼉鼉宮吾聞日本自唐代納賈來庭列

王會文物略與朝鮮同形勝差侔夜郎大元時

負險抗不朝前明詔諭通風潮非常銀幣賜國主不斷金戈喧賊曹

聖清受命綏邊寇度外優容德天覆忍使龍蛇

走大陸無復貌貅嚴斥埃斷鼇立極區海疆綠

波如鏡底重洋乃知寬大漢天子不假羈縻周
越裳關白何來平秀吉征夷起作倭奴弼日本
奴國王之下有稱關白者最尊舟師爭趣碧蹄
征夷將軍日官名皆見明史館謂保護朝冠服紛從泰西律邦交在和人共
鮮國事知伐謀有術今其時舊游宛宛君能說君嘗渡海游日
本諸此去方當勤職司橫濱神戶長崎島治度
城開峭寒早他箕山色稱最佳人力車聲馳更
好好是天涯若比鄰迢迢東北萬由旬君看析
木崖邊月明洪武時遣使詔諭日人由海道自析木崖入其國境今不知爲三島何地
也爲念中朝薄宦人

退思軒四

十三

四月十九日作

不斷離宮別苑開瑤池親降漢皇來馬卿有賦
詞難達狗監無人事可哀

避暑盛營平樂館奉宸還繕集靈臺

聖懷豈是耽游獵虛擬西都侍從才

去年朱蓉生侍御一

新和子詩有聞道上林游獵美肯將詞賦薄相如之句今誦之益感云

長歌行東再同編修即用其鄉祠宴集

詩韻

仕不能立功取爵萬戶侯隱不能沽歌歸臥三
層樓一身如葉擲人海風飄波轉隨飛浮衣冠

久愧紫芝曲鼓吹但有黃栗留閒官落寞向時
輩冉冉去日春還秋就令百歲等泡影誰遣孤
抱開塵眸眼中之人屬吾子清廟彝鼎雕精鏐
九衢絕足縹騏驎騷情鬱塞行夷猶懷哉叢桂
與香草郁烈瞬淪林薄幽回黃轉綠眴世變知
白守黑羞身謀抱琴日夕意蕭索賞音絕少伶
州鳩吁嗟賞音難可求若水共濟稀同舟撫今
慨往卅年事竹帛誰與先達伴作詩盛述南國
美飛蓋偶趁西園游我賡子吟相唱酬腕底蠅
沓煙雲收願把憂時忠愛證杜甫慎莫使人怨

退思軒四

西

悱疑莊周

莊子怨悱之書梅伯言氏之言如此

西風

青天不可上虎豹九關深便擬驂龍去何如跨
鳳臨三山今日事四海昔年心只恐西風裏寒
添島樹陰

題瀟湘寄舫

我從瀟湘來苦憶瀟湘水不見瀟湘見明月月
下關山幾千里去年秋氣入悲歌今年秋來情
更多張翰蓴鱸等閒事扁舟不決當如何香王
老人謂徐中丞發奇想宦海蒼茫支寄舫破浪時

無宗慙風蓬萊路阻行安往眼底滔滔不可云
荒荒溟渤一迷津狂瀾勢倒誰能挽愁絕中流
擊楫人

青城山歌題易中實觀察順鼎舊游圖

冊

青城第五之洞天真籙紀自軒皇年寶仙九室
此福地上司岳瀆蟠西川二千里遠勢橫絕蒼
然秀壓坤維裂下界低飛灌口雲高臺近見峨
眉雪靈區奧府接紫冥揆奇討勝徵圖經棲真
古有丈人觀化鶴今誰徐佐卿我行舊是成都

退思軒四

五

客惆悵名山游未得妙繪何期入塵眼蕉窗斗
落芙蓉色手君青城圖誦君青城詩真形縹緲
不可見想見錦屏玉壁初攀時幽巖猿鳥應前
導采藥相逢幾丹竈瑤草琪花世外春俗緣凡
骨都稀到石泉如雨灑玉壇天風颯沓非人間
上清晶晶日月古太素漠漠冰霜寒行歌跨鹿
剛秋霽卅六霄光碧無際蠟屐歸來萬緣中襟
裾半帶星辰氣君乎壯游誰與同爲君吟望寫
靈蹤徑思六翮凌風去飽看岷山第一峰

醉攜紅袖看吳鉤軸子爲鄭芝孫太守

業敷

西征舊夢冷邊關珠海恩恩罷戰還眼底太平
無一事閒情拌醉玉樓間

莫把珠釵教美人任他鐵繡醒龍鱗孫吳今日
都何用祇合人前岸角巾

秋水芙蓉出手寒偶攜紅袖倚肩看斬鯨遼海
真無望不用親提上玉鞍

退思軒詩集卷第四

退思軒四

六

退思軒詩集卷第五

長沙張百熙著 門人汾陽王式通校

陳竹香同年以潞河秋感詩見示悵然

有作

西風警鴈淒絕潞河秋以子蒼茫感增予浩
渺愁山城彭澤酒水驛洞庭舟一夜鄉心發江
湖何處流

和張樵楚保定道中見懷之作即次原

韻計距樵楚作詩時十年矣

離心一夕離華山十載思君別後顏豈意干戈

退思軒五

驚世難更同簪組綴朝班貞元坐覺詩人老定
遠爭推絕國還珍重干霄龍劍在鬱騰虹氣斗
牛間

文軌車書萬國同憂危心事盛明中金酬駿骨
燕臺月石動鯨鱗漢苑風舞羽早陳階左右談
瀛誰究海西東通才眼底如君少數擬相隨問
鑿空

同聽秋聲圖爲志伯愚閣學題

依依坡潁夜聯牀梧館秋聲月滿廊百事變遷
非夙昔一官中外有輝光

時伯愚閣學在京
仲魯觀察在鄂天

涯舊夢溫雙雁海上名城憶五羊若問越王臺
畔路去來風景幾滄桑

題蓮沼盟鷗圖三首

清淺蓮塘一鑑平紅香不隔水盈盈憎他人海
風波險來結閒鷗世外盟

碧染窗紗綠浸裾千絲楊柳萬芙蓉鳳城一角
香如海占得西涯半畝居

幽尋曾此駐花驄畫樓臺萬綠中赤日行天
人不覺滿衣涼沁紫荷風

雜擬十九首

退思軒五

日月忽云邁秋氣肅以森落葉辭故枝寒條蔓
荒林生理日凋索芳華遂銷沈淒淒感微陽黯
黯見凝陰履霜夫如何時至良難任

義轡迹駸駸緋纚安可維前賢去若引來哲紛
相催壯顏攬明鏡豈得無衰穢天地生我身我
生果何爲吾將叩真宰天高鬱巍巍太息不能
言幽憂當訴誰

廣寒天上宮星辰四橫斜陰雲來蔽虧中有蝕
月蟾借問安致此太息還咨嗟羲和當堯年調
劑其歲差未聞乖氣沴乃爾奸陽和白玉爲仙

京七寶成山河玉斧不能修奈此月蝕何
鳳凰從西來下視百鳥羣高翔在阿閣銜圖卜
昌辰靈徵覽德輝烏取苞采紛勢當舉八極誰
與開陰氛翩翩朝陽詩藹藹宜吉人

登高望碣石寂寞黃金臺求賢古人心燕昭安
在哉霸業盛當時列國震稜威自非樂毅傳焉
能濟傾危千秋述陳事感歎復徘徊駿骨不見
收何以致龍媒

近不見眉睫大不見泰山咫尺有如斯何論萬
里間物情習顛倒時乎多險艱天鑒不在茲負

退思軒五

三

絕蒼龍關二氣有溫肅乃正暑與寒斗柄失其
衡坐覺陰陽干昭昭垂變象人事良可歎

洪流決瓠子河伯何不仁百萬化為魚悲哉甯
忍聞宣房勤漢帝負薪詔羣臣不惜水衡錢拯
此未死民思災軫宸慮紀事銜聖恩秋風夫何
為簫鼓發橫汾遂駐上林蹕還作銅仙人柏梁
高崔嵬昆池水鱗鱗西京有遺蹟燦爛垂千春
巨弩殺大魚戎弓射長蛟祖龍安足陳漢武何
雄豪方其駐天蹕俯視波滔滔鸞旗颯飄然控
弦風怒號神威一震動水族紛潛逃遺蹤不能

求濁浪愁腥臊

金門白玉堂綺麗天人居大婦貴家女中婦傾
城姝嫁來茲幾年婉變真有餘相期勤內職稱
此千金軀秋風夕多驚繁霜下庭蕪纖素思禦
寒織嫌以為襦云何理機杼手爪空區區終日
不成章徒憐新舊殊

四夷西漢時騷擾病中外撫綏竟何術蕭然多
煩費朝廷亟繕用功利驚茲會公孫漢丞相曲
廉譏布被鉤稽桑孔才乃據大農位秋豪眇能
析民生益凋瘵食貨豈不偉浮議信非貴吏道

退思軒五

四

雜賈人終為國凶害八書誦平準慨焉發遙喟
李斯亂天綱侈議焚詩書縱無三族哀甯道斧
鉞誅漂流禍四海四海紛悲吁安知衰微後再
見功廓如道晦久彌顯抱殘在師儒所以老伏
生遺經守區區

學校故莘莘遺文習孔孟誣民出邪說洵若洪
水橫古今無異教天地有真性聖道在霄壤不
以世衰盛豈伊夷貊言加此儒術正強哉不變
塞願言師往行

風疾知草勁歲寒識松貞薄植爛春華零落無

冬榮繽紛諧媚子奔鶩勞其生奈何儒家流役
役殉浮名簪紱不足貴鐘鼎烏足驚明德以爲
憂白首宜何成

陰陽一橐籥賦性立人道中庸固懸絕狂狷亦
云好成功在變化不在操與矯有山何巖巖有
水何渺渺鑿石采奇珍探淵得環寶意奢無捷
獲人至儼天造介然萬物閒誰謂此躬貌

簞瓢易珪組奚繫辱與榮盜跖殀天年宜損稔
惡名凶人有倖死聖哲無虛生常儀順盈虧日
昃當西傾庸庸苟富貴覲顏覲脩齡一奏雍門

絃淒絕愚者聽

南山有鵠鳴聞聲識凶禍貪鳥爲之翼惡鳥爲
之佐殘食其衆禽悲哀防巢破啾啾豈得已騷
騷北風大鷹鷂不搏擊飛鳴顧相和遂令脫繒
繳銜矢轉妖作逢蒙縮手歎養由亦無那羣生
爾何辜遠睨紛涕唾

結交二三子大雅卓不羣名節以相高文章亦
彬彬至誼無苟合竄想期古人通塞故有時所
貴非一身在山爲豹霧在天爲龍雲運會其何
常悠悠論屈伸

退思軒五

五

驅車適燕趙行行動悲歌不知古人心慷慨當
如何羣沙蔽白日颼風吹遠波雄疆帶山海秋
色蒼然多霜林自紅酣萬葉同一柯淒無凌寒
姿將焉慰蹉跎攬轡黯將夕四顧空愁眠
旋蓬無定飄風花無定飛人生百歲閒勞勞空
爾爲山川送離別日月生憂危出門心茫然但
覺景物非舉目何所見荆榛蔓中樞傾耳何所
聞朔風聲正悲功名已後時又不早旋歸獨有
楊朱泣淚下如珠纍

前獨漉篇

退思軒五

六

獨漉獨漉泥行沒軸沒軸尚可覆車傷我何草
不死何蘭不芳芳芷杜蘅懷我沅湘楚臣被放
離騷始作忠不見原肝膽銷鑠蓼蟲習苦不知
其非梟鸞異棲於性固違皇天謂何明有日月
九關斬斬虎豹森列

後獨漉篇

獨漉獨漉彈箏擊筑來日大難去日苦促沈沈
白日淒淒元雲蕭蕭繁霜水深雪零水深無梁
雪零無舟瞻望中原山川悠悠我思古人風雨
如晦不見昔者使我心痾高臺摧積碣石嵯峨

蕪歲不治奈碣石何

漫吟

閉門靜掃馬蹄塵小飲時攜灑酒巾采菊閒懷
陶靖節紉蘭幽感屈靈均人間祇合蜘蛛隱地
下甯論蟣蝨臣勛業行藏千古事悠悠真媿百
年身

有感四首同瞿學士

鴻機作

雷雨天威震祈年一炬殘

皇心能惕厲民事屬艱難元祀周蒼壁豐儀漢
紫壇向來殷薦地占驗獨長歎

退思軒五

七

含光唐殿曉長樂漢宮秋豈曰遊觀美其如宵
旰憂萬方關至計

九廟有詒謀

聖德當年頌祗承在

帝猷

朝野歡娛日勤勞相業宣猶聞中興盛如見太
平年事會成今昔人才有後先難將憂國意慘
澹問時賢

言路國元氣官箴古諫司憂危

祖宗世感激

聖明時折檻無全盛

垂裳有

睿慈誰能憑忠膽侃侃向

形埤

和黃麓荃戶部九日天甯寺登高之作

六朝勝蹟獨懷古九日清遊一放歌濁酒黃花
聊復爾浮雲白日奈愁何川原北控盧龍壯關
塞南通去雁多直擬從君共回首故山無恙滿
烟蘿

和宋芸子編修雪後對菊寓懷之作

退思軒五

八

簪組從容同大隱江山搖落感新詩編修有如
搖落之句看朱成碧紛千變轉綠回黃又一時杜老
孤舟他日淚陶公三徑故園思誰憐覽古傷懷
抱傲雪凌霜自護持

贈屠梅君侍御

仁守

秋心鬱幽騷援琴發商聲一彈元霍哀慷慨有
餘情罷絃月在席攬衣步前楹晚花惜孤妍庭
柯撫冬青念我素心人百感紛交并浮生嬰世
網素懷厲清節與子俱盛年簪纓綴朝列閒官
百無補微祿坐忝竊我我獬豸冠諤諤古風烈

吾子踐清要感激腸內熱抗手排

天閭白日照

宮闕宮闕鬱雲興

御苑何輝煌

聖母簡臨朝

明君治垂裳廷臣有謀畫密勿不可詳殷憂邁

天時未覩生民康吾子抒忠愛諫諍於我

皇滄訛感詩人陰凝憂履霜天聽其如何屏營

心內傷心傷何終極累歎還太息嚴霜墮勁草

飄風鍛高翼金石有銷鑠墜露無再滴國香不

退思軒五

九

見采蘭芳委榛棘秋氣日以森寒蟬晚寂歷覽

物重咨歎元化安可測何當叩真宰一為起沈

抑沈抑詎天心孤臣自疏遠良無肺附重甯曰

謀國短違時成棄置含識慨忠款而子顧夷然

憂世獨繾綣淹遲戀

北闕望

主意尤婉豈與咄咄流書空默淒斷淒斷勿復

陳得失甯更論人生若朝露所志規千春窮當

樂泉石達不苟一身與子昔南還攬轡黃河濬

慨焉語澄清意氣卓不羣豈圖事迤邐奄忽及

茲辰北風吹霰雪彌天有層雲向夕起長謠臨

篇屢逡巡逡巡將語誰念子行當歸羈鳥戀匹

儔代馬失羣悲眷此平生親風義久不虧別長

苦會短惘然惜流暉時無白駒詩焉得繫與維

耿耿寫衿曲去日難更追諒非兒女仁但傷形

影違憂來其無端淚下不可揮

雜興詩十七首

燕趙悲歌地飄蕭木葉秋登高楚客淚望遠漢

臣愁歲月無安枕乾坤入倚樓西風滿城闕驅

馬意悠悠

退思軒五

十

漢苑仍民力周臺豈

聖心承

歡

帝孝大感事

國恩深

慈極今長信華榭古上林深維

祖訓在

儉德萬方欽

繼統球圖重

詒謀帶礪長沖齡仰

聖祖同揆望

今皇願廣延英對誠求濟世方危明與憂盛此意不能忘

灑澹終何術蛇龍患氣深迷茫禹蹟汎濫軫堯心故道移東注橫流忌北侵如何畿輔重水害挾愁霖

荒政無全策罄鴻事可憂遲回六廠食悽惻萬民流州邑循良少

朝廷賑恤優似聞全盛日凶歲有綢繆

陰靈淪日月掩徑黯愁予屋漏無乾處河公此

退思軒五

土

敝居漂搖及

宮苑倉卒議溝渠不恤吾廬破窮檐患莫紓

補屋乘秋霽支牀穩夜驚篋衣侵壁損窗燭檢

書明鄉信淹南菊霜華老北橙掃除聊一室再

再覬浮生

諫草堂鄰近斯人宛在茲崢嶸見遺疏悵望不

同時鐵像東岡祀丹心西市詩權奸澌滅盡忠

魄永陵知

煩憂疚肝肺小極邁霜天病臥淹旬日吾衰感

卅年難輕賡理疾擬究脈書篇此術同良相觀

時一憮然

柄國傾朝列中書勢絕倫時當矢報稱力與戒因循三旨無才相諸公自重臣血誠勤贊畫八表待經綸

強鄰萌虎視東省翼神都訓練兵虛實傳聞事有無將因議同軌莫廢習陰符徵調論遲速安危在廟謨

就日開夷邸占星汎斗槎爭傳使絕域誰為急公家士氣軍前壘憂端海上笳邦交與邦政莫

退思軒五

土

我自疵瑕

愚慮曾何補微官亦強顏一家叨祿食十載點

朝班離思天涯月鄉心畫裏山惘然南去雁迢

遞度燕關

去夢縈先壟歸懷阻故園驚心身老大彈指歲

寒暄兩暮淒長笛風秋犯短轅閉門時息影聊

用却塵喧

湘上敝廬在應無熱客來花畦邊水拓松館傍

山開且可安吟席差同賦鑿坯吾其媿後鳥留

滯尚金臺

五十予兄健脩然鬢未霜花期悵風雨竹訊憶
瀟湘何日辭微祿相從海嶽堂漫勞春草句惘
惘夢池塘

耕釣宜吾分稽遲負

聖明聊從卜詹尹未擬問君平坐攬山川勝長
歌天地清蒼茫向真宰鬱鬱古今情

題瞿魯青先生自繪二圖

枯槎自濟圖

滄海橫流事奈何王尼老去感時多側身懷古
真同嘅遺像如公亦莫過舊日衣冠式南國高

退思軒五

五

風笠屐邁東坡迷津眼底無能問擬學浮槎一
放歌

分燈課子圖

高門令子推三鳳少小才名並一時忽忽存亡
都老宿依依圖繪動懷思再傳金馬郎君貴早
賦銀魚學士詩我亦清芬留祖硯故家喬木愧
孫枝

贈龔省吾儀曹

鎮湘

安居奉母老萊子盛歲能詩高達夫廿載一官
成俛仰兩朝百事見榮枯漢廷莫歎為郎久祠

部還箴闕禮無早晚西臺錄才彥好陳忠悃切
匡扶

君時將試御史

春隄試馬圖為何潤夫京兆題

東風綠盡西湖樹春好憑誰覓春去得意何郎
試馬來尋春直到春深處繡勒錦韉新鑿蹄一
鞭花雨草萋萋天然畫景垂楊路知是蘇隄是
白隄飛鞚翩翩疾于鳥駿馬才人爭腰裏可憐
綺陌豔陽春不見

離宮舊時道

御道當時迤邐開

退思軒五

五

南巡

仙蹕扈龍媒羽林萬騎從天下天廐驊騮盡軼
材兩驟星馳人事改

宮門冷闕湖山在蕭條林壑鳥呼風盛事真應
曠千載寒日銅駝感慨中乾嘉荏苒到咸同黃
塵蹴踏兵戈起百戰才收汗馬功遺蹤刻盡繁
華歇擻笛聲淒淒壺缺莫問龍盤

九殿雲更無鶴守孤山雪尊酒流連退省庵

兩

秋余訪大司馬彭雪琴丈於西湖
退省庵丈招飲湖上流連竟日
幽尋我亦舊
停驂南屏鐘動淹歸轡韵事無人寫夕嵐君心

清絕伴冰玉選畫徵詩燦成軸一晌春游二十
年年夢墮西湖曲去住休論今昔情壯懷如
月向君傾據峯顧盼英雄事君不見麟閣雲臺
萬古名

感賦一首

心如月皎事雲浮

浮雲世事改孤月此心明東坡次韵江晦叔詩今用其意

古事今情貉一邱相士皮毛魏濤鑑照人肝膽
看吳鉤禍機卒發憐狐鼠歸夢粗安到鷺鷥
聖主恩深忘不得瞻

天惟有涕橫流

退思軒五

五

湯興

廣樂鈞天事有無夢回帝所一身孤人間何路
求三島世外扁舟隔五湖耕釣逝當從湯叟文
章聊可學潛夫藥洲洲畔花如繡獨向西風聽
鷓鴣

秋感八首

昔杜子美作秋興八首李獻吉賦秋
懷以擬之天地中聲後先千古而撫
時感事情見乎詞蓋君國之念身世
之悲有不能已者非漫然而作也百

熙秋氣多愁鬱伊善感忘其誦薄輒
用長句為秋感八章非敢趨步邯鄲
亦聊抒幽憤之私懷云爾

露冷花田葉未凋秋清瘴海碧迢迢山川潯洗
蒼龍雨城郭涼生白馬潮天外芙蓉
雙闕迴湘南蘅芷一身遙茫茫眼底愁何限夢
繞珠江夜不銷

未信東南物力微連雲番舶駛如飛農商交病
民生索盜賊公行吏事非肉食一官雙鬢冷目
營四海寸心違皇華忝賦詩人句楊柳依依雪

退思軒五

六

不霏

粵中無雪故云

承明侍從珮春容簪筆朝朝傍
九重嶺表一持星使節天涯孤憶
景陽鐘頗聞宰相稱三旨忍使
朝廷有四凶喜見

垂簾

堯舜日八方歌舞頌時雍

迢遞燕雲望

帝鄉

離宮秋氣滿長楊致光去國唐宗弱

退思軒詩集卷第六

長沙張百熙著 門人汾陽王式通校

畫馬

要駕昔聞千里馬漢詔云馬有奔蹏而致千里

跡馳之士要駕之馬亦在乎御良工誰是九方

歎更無羈勒遭驚敗如有馬驚車敗陛下縱自

傳袁盎但有新圖寄嘒呻輕奈高廟太后何見史記

青眼望騏驎駑駘減盡天閑色神物何時一降

真

聞雁二首

退思軒

秋夜未半天低河雁飛在天水生波南雲潛度

欲安往北風哀鳴如爾何瓊樓玉宇消息斷瑤

柱冰絃幽怨多聞道凌霄有鸞鶴安得送我同

駕鵝

秋夜夜半天兩霜臥聞雁聲聲斷腸歸飛且可

避繒繳飽食莫須貪稻粱天邊碧月顧影失地

上黑風摧羽傷起坐為汝一愁歎江湖萬里心

蒼茫

潮州劉教授

鳳輝

以所輯東坡居士居

儋錄見貽意有所感遂題其後

紹聖當年黨禍深遺編千載一霄襟神京北望
恩非淺瘴海南遷老更侵報國孤忠空白首投
荒九死見丹心桄榔尚說庵居舊笠屐風流何
處尋

意有未盡再題二律

奇才知遇感先皇晚歲遭回徙瘴鄉萬里嶺南

餘涕淚千秋海外有文章采風手校居儋錄醉

月心懸載酒堂儋距瓊州三百里而遙按一事

類公差不恨七年供奉

殿西廊用公次韻韶守詩句公入侍延和前後

退思軒

際偶合前賢不禁

要使天驕識鳳麟用公送子由讀公詩句氣無

倫豈期變法紛朝政差免書名到黨人修怨古

聞章相國

推恩今見

宋宣仁百熙以主事康有為講求時務所識博

通之士多稱道其才者因以其名咨送

特科當聲明錫除忌諱酌中採取等語此念與

主事素不相識其心術純正與否不可知復據

實疏陳並將該員業蒙 欽派差使可否免其

考試之處聲明請 旨又片陳中國自強在政

不在教請 明降諭旨禁而免為從西之導均仰

沐等名目以維持名教而免為從西之導均仰

無不及也過書舉燭明何在削牘真歎舊侍臣百熙謝
恩疏引咎自責有曾
無舉燭之明等語

余題居僖錄詩幕中諸君皆有和作
此報之

好句翻嫌擊鉢遲聯翩珠玉燦新詩霞裾璫珮

真人想鐵板銅琶學士詞蓮幕風流心是錦梅

溪霜氣鬢如絲嘉應古曰梅州河曰梅溪四愁愁絕張平子

振觸當筵賭唱時

寄胡德齋大令欽南昌

胡侯貌古有古心身無六尺氣百尋握槩低頭

退思軒六

三

習書史下筆出手紛瑣琳金門射策失高第一

官奔走章江潯折翬彭澤意骭髀比跡梅福才

深沈論文鑠院識君晚余典江西鄉試君適清奉徽為內收掌官

言妙緒開余襟有時高論動四座舌橋不下人

為瘖作詩餘事亦賈絕風塵落寞稀知音縱橫

抵掌笑相視識曲此意同牙琴吁噫憂患值世

難悲秋往往耽秋吟客懷悄與山色冷別思瞬

逐江波深北風吹帆發南浦水驛風寒聞戰鼓

夢裏鯨濤動地來雁聲警入蠻天雨濤頭有弩

射不得橫海無人擅材武雄邊襟帶橫割棄百

萬貌貅竟何補驚心鶴唳幾摧傷回首驪歌一
愁苦杯酒離亭迴隔年浮雲興滅海門天思君
望月三千里尺素書來情渺緜眼明起誦感時
句君郵寄感事詩十六首干將出匣鋒無前放翁孤憤有
如此杜子煩憂相黯然酬君長歌寄遙慨熱血
揮灑桃花牋

和龔省吾太守居廬八詩

雙阡松蔭

佳城雙崔嵬川原互縈抱蔚彼山上松蔭此墓
門草遺型瞻岵岵令緒後賢紹何以述清風萬

退思軒六

四

古瀧阡表

止潭柳釣

江海厭波濤幽居愜春永澄心邁止水境絕塵
事屏閒尋老漁樂意與浮鷗靜獨釣柳絲風斜

陽澹孤影

雲母晴嵐

峩峩雲母山隱隱幽人宅丹竈古千年瑤源春
一脈嵐光喻靈氣晴暈石華白安得入雲深一

訪餐霞客

圭峰積雪

雪後山四圍茲峰獨幽絕朝疑瓊島雲夕訝瑤臺月冰花凍不落林壑皓以潔寒襲倚樓人風摧笛聲裂

寺鐘迎月

鐘鳴碧山暮古寺絕塵響僧衲帶雲歸佛樓延月上卷簾宜夕詠掃榻期秋爽清境在人閒誰歎成獨往

竹屋延涼

老屋白雲坳雲深鎖修竹千竿暮晴翠一徑入寒綠披襟不覺暑夏涼銷午潯何日抱琴來爲

寫龍吟曲

退思軒木

五

石礪泉聲

礪壑始何年岿然劃崖斷泉聲漱蘿徑石氣冷松館溶溶春雨足激激谿痕滿流出碧桃花仙源知近遠

梅移詩訊

梅移滯芳信竹墅淹春酌凍勒雪中花晴探水邊閣閒攜季迪句問訊林家鶴應有向南枝橫斜出籬落

贈汪太守 時綬

落拓詞人兩鬢絲故山迢遞獨歸遲秋風秋雨楓橋路猶有鐘聲似舊時

廣秋宵七恨

明人李宗表

昱

草閣集有秋宵七恨

詩曰風曰雨曰月曰砧曰笛曰蛩曰雁自敘云荀卿賦篇於知雲蠶箴之辭始隱而終露又疊以應之予愛其異偶值秋宵不堪旅況韻成七恨以爲一代之新體今誦其詩實則胎源於少陵同谷七歌而稍變其音節耳

退思軒木

六

百熙性耽秋寂擬爲秋星秋霜秋笳秋鐘秋鐙秋蟬秋猿七首命曰廣秋宵七恨以補草閣之所未及末二換韻亦猶少陵七歌之體也

銀河西流月光黑斗柄橫江江墨色更深風露襲襟袂短榻無膠眠不得錦裳消息斷牛女離恨天長意悽惻客懷不樂宵沈冥吁噫恨爾之秋星星

露草蒼蒼離蕪歲中央道阻伊人在歲晏誰先雨雪憂陰凝欲忘堅冰戒凋華實物盡毀攬

景徒增後時慨時乎時乎秋正長吁噫恨爾之

秋霜霜

西風蕭條聲激楚月黑營門峭深阻淒然水驛
雜嚴更使我愁心碎千縷何不樓船蹴滄海吹
向邊雲散胡虜壞雲四野天一涯吁噫恨爾之

秋笳笳

禪扃棲煙隔巖洞幾杵沈沈帶霜重聽斷端門
五夜聲敲殘海嶠孤臣夢低徊撫髀發清警世
亂時危有深慟烏啼落月低前峰吁噫恨爾之

秋鐘鐘

退思軒六

七

我生少小嬰世難展轉兵戈返鄉閭家貧兄弟
同夜讀短檠光寒照書案艱難回首四十載對
汝愁深人聚散影予短髮方鬢髻吁噫恨爾之

秋鐙鐙

殘陽已暝天寥寂高柳疎槐水邊驛汎梗愁添
薄宦人幾枝腸斷無情碧含風飲露豈不美弱
羽聲繁了何益感歎微生心惓然吁噫恨爾之

秋蟬蟬

斷續悲風嘯巖穴我行邁此腸九折三聲淚下
巴山雨獨夜霑裳洞庭月一官奔走役嶺外爲

汝宵深復淒絕壯懷淒絕誰與言吁噫恨爾之

秋猿猿

游羅浮不果却賦

咫尺羅浮峰不見人間何處覓蓬萊徑思騎蝶
凌風去萬樹梅花花正開客夢禁霜虛縞袂仙
心和月冷丹臺上真福地吾無分一笑紅塵作
棄才

擬游羅浮先之以詩

我聞羅浮山高三萬六千尺洞天福地仙人宅
四時靈氣古風雨別島神光堯日月塵飛不到

退思軒六

八

天一涯圖經指點最幽遐珠明第七之洞杳何
許但覺四百三十二峰山勢青崕岿山中何所
有萬樹梅花小春後登山何所遭啁啾翠羽隨
花飄手招彩蜨翩躚影行訪中庵到仙頂玉局
無人寫句來笛聲喚起詩魂醒昔年憶作孤山
游梅花未開天正秋老雀無聲暗香盡狂歌獨
掉西湖舟前年度嶺探梅信南枝不花北枝暝
茲行且喜到深冬看花肯復虛名勝當時葛仙
翁采藥茲山中願借仙家葛陂杖化作天矯青
天龍騎龍飛度羅浮去高詠梅花最深處

錢南園通政畫馬為徐頌閣官保題

少陵畫馬詩有神縱橫氣吐千驎南園墨妙
推第一寫照時無浣花筆坐令兩馬無晶光尺
素慘澹凋星霜側身青雲感伏櫪回首黃沙空
戰場當時國步方全盛鐵騎騰驤笳鼓競萬里
風煙蹴踏開塵清四海波如鏡此馬與人成大
功關山力盡陣雲中長楸廝養恩猶渥邊草荒
涼氣自雄斯圖流傳歲時久世變浮雲百年後
西極方期天馬來中原忍放龍蛇走如何島國
勢披猖倉卒徵師禦犬羊十萬天閑材盡下更

退思軒六

九

無單騎起汾陽驂騑崛起應無敵控縱宜寬鞭
筆力王良不精御馬術欲效馳驅徒太息嗚呼
相馬同相士駿骨還求古燕市房星天駟如有
靈願降天龍佐

天子

再題一首

黃金臺荒神駿少落日西風滿秋草眼前快意
見權奇一騎差羸一驥褒馬曹者誰其職司通
政畫意令人思鹽車阨驥老可惜千里驂駒須
及時王良伯樂今難得駑驥同閑黯無色安得

驂騑駟都軼羣一時馳騁八極無驚塵

南園畫馬為翁尚書題

天不見房星化馬如化龍地不聞渥洼產馬成
青驄腥臊六合盡泥滓誰與汗血收奇功咄哉
何處得此種意態雄奇聲價重軒然神力掃驚
駘似恐馳驅憂駕要南園畫筆迴絕倫此馬一
出真空羣想當奇氣發胸臆潑墨淋漓如有神
意匠經營工畫骨習霍精靈下雲物經思擘駿
籀崑崙伫盼成龍蹴溟渤豪情壯志不可償風
塵萬里天蒼茫沙寒草衰首偃短但見凡馬多

退思軒六

十

肉誇騰驤監牧天閑有專政御馬深期知馬性
驪黃牝牡亦何有要參長材成上乘黃金騎綠
玉螭絕足不假勞鞭笞識途之效古所重發縱
指示今其時按圖低徊求畫意聞道人有騏驎

題故朝邑相國閻文介公墓槐仰梧書

屋圖

我聞朝邑古臨晉控帶三輔屏長安青山西走
華原坂黃河東繞蒲津關河山閒氣鍾人傑相
國高名光日月巖巖清望蔚人寰耿耿忠肝照

天闕箕尾星沈北斗昏故山喬木古風存時人
豔說平泉宅父老爭傳通德門忠孝由來有根
抵世代清芬吁足紀槐花梧葉舊居荒遺澤分
明畫圖裏尺波電謝不可留丹青好在公千秋
烏飛兔走十年事鼉作鯨呿四海憂地蹙民窮
膏血盡漢困匈奴周獵狁始信夷吾天下才不
疑山海生來窘我生未識范希文攬卷瞿然後
死身何當一續崧高頌太華終南再降神

酬舒棠陔茂才即贈

飄零詞客風塵裏數口依人苦未休舊日長鑱

退思軒六

士

鄉國夢新霜短褐

帝城秋

朝廷北極思全盛民物中華入隱憂世事天心
兩難測酒懷詩膽一相酬

贈程子大茂才

瀉山英俊起長沙湘社詞章擅作家酒會遠拋
中散竹衣塵來看上林花鞦韆明月張三影冠
劍丁年溫八叉我媿江淹才調減祇餘心事向
煙霞

題韓翬蘋小影

奇緣一日傳紅葉韻事千秋說翠蘋如燕誰窺
御溝影驚鴻擬貌洛川神寫真妙筆空流輩感
遇深懷託美人際會不常時晚晚蛾眉顚額鏡
中春

峽山寺二首

天開禹峽鎮炎維地擁禪關瞰水湄荒徑蝸苔
初祖石初祖石即達摩石空廊蟲蘚故王碑方丈後廊有南平王
尚藩可喜康熙二年重修山寺碑記近人山靄霏霏落留客江風
浩浩吹時北風大作舟不得上因得爲竟日之游聞道飛來似靈鷲
蕭梁遺蹟渺難追中峽飛來寺梁普通年自舒州飛來見吳震方嶺南雜記

退思軒六

士

中峽寺前江水長飛泉亭畔客衣涼晴噴巖瀑
諸天雨陰裏林霏五月霜塵海清遊如舊夢雲
臺靈氣已全荒山中有雲臺二字爲羅昭諫書今已不存十洲仙氣集雲臺吾
鄉李石梧先生峽山寺詩句也古人不作仙猿杳感事從誰話
海桑

門人張奇田孝廉爲峽山古蹟詩余亦

同作四首

避秦處

秦嬴弛天綱四海一塗炭南州地荒服擾擾同
世難牛毛法網密蘭足兵戈亂囂佗亦人豪豈

不恤流散民生漏刀俎偷息穴草蔓世外無甲
子山中有宵旦乃知桃花源圖記語非譫如何
千載下感切王尼歎弔古意低徊殘陽下松澗

觀棋石

二儀列方罫天地幾龍戰用何仲默句河山憂急劫
全局規利便狡獪何仙人彈指一枰見縱橫勢
如雨勝敗機若電玉塵輸未惜十斛瀛洲賤誰
從壁上觀柯爛意不倦棋聲闐已寂石色老猶
舊至今方丈地冷落碧雲片

仙猿洞

退思軒

十三

盤雲攀石磴捫蘿睇飛崖荒洞空黝然蒼蒼封
古苔神物去已久茲境無囂埃方其墮塵劫唐
苑千樓臺兵火上陽宮胡塵有餘哀玉環悟靈
化出垢超形骸逍遙神仙家絳闕峰蓬萊控景
躡流電一往何時回我聞老袁公神術古所推
何當析元妙赤手生風雷截海鱸蛟蜃六合天
爲開渺冥安可期感激烈士懷

達摩石

不見拜經臺言尋達摩石丹梯凌萬仞翠壁俯
千尺陂陀祇樹春犖确古苔蝕傳衣定何代妙

諦一拳赤厯劫亘不磨纖塵淨如拭靈臺喻明
鏡彼岸卓飛錫一葦絕波清孤根臥雲白心空
意識界身定安樂國天下事不空則不定石即之定石之無意識也
此悟真如惺然渡江客

退思軒詩集卷第六

退思軒六

西

湖北黃岡
陶子麟刊

退思軒詩集補遺

長沙張百熙著 門人汾陽王式通校

孤鸞吟爲湘鄉成貞婦作

孤鸞不雙翔別鶴相背飛皎皎鍾氏女盈盈耀
深閨玉貌都且閒四德性所諧娟娟何姍姍生
小依庭闈阿耶遠遊宦遠在浙水濱女行從阿
耶相攸字成門幾年西湖曲幾度孤山春初從
故鄉來還歸故鄉去去來幾千里阿耶杳何處
麻衣血相視但見墓門樹悽惶復悽惶悽惶共
誰語伶俜坐悲惋垂垂歲華換十五擅鍼巧十

退思遺

一

六解詞翰十七嫻禮儀嘖嘖聞里閭迢迢通青
鳥雖雖賦鳴雁標梅迨其吉相要明星爛夫壻
如瓊瑰誰能不稱歎人言夫壻殊會合當須臾
親迎頗有期五日空歛歛夭桃不成實穠李霜
中枯李花霜中折郎君死離別無緣結恩義痛
此腸寸裂生當遂來歸死當誓同穴身是成門
婦不向他人活親黨聞此言各各驚且怛長老
聞此言委曲相譬說雪涕向長老女非敢專由
女志不可奪鴛鴦自成對寡鵠不亂行身是成
門婦我何難自量拔我金雀釵卻我明珠璫易

我舊時衣上下羅襦裳與郎服斬衰爲郎洗紅
粧素車到成門入門拜姑章入門拜夫壻遺挂
悽在壁哭郎郎不聞房櫳履郎迹承顏得姑愛
弔影背姑泣哀動天人心扶持神明力艱難立
孤子忍死存弱息衣冠爲歎美婦女爲慘戚見
者爲酸辛聞者爲感激感激還咨嗟壽命固有
涯甯爲冬青木不作春天葩亭亭女貞枝蕭森
冰雪華何以表貞節湘山石嵯峨何以喻懷清
湘水無泥沙水亦有時竭石亦有時泐女名難
可磨吁嘻二心人但看鍾淑娥

退思遺

二

劉博泉給諫前輩爲觀荷之會招同陸

鳳石侍讀

潤庠

秦雨亭庶子

潤春 陳

竹香檢討

存懋

高曦亭編修

賡恩 飲

北淀酒樓賦長句一首

給事愛花兼愛客暇日招邀帝城北北淀晴喧
繡勒聲南樓陰護珠簾色是時薄雲生午涼翠
蓋掩映紅荷裳縹緲塵十丈污不到縱橫百畝開
銀塘主人歡笑客懷好把酒看花豁襟抱人生
行樂須及時莫待無花爲花惱長白長公丈人
行飲我當年酒樓上就中張子特英妙虎氣龍

身屹相向日月逝矣今幾時再來觸我黃壚思
世丈長樂初將軍善嘗飲于此樓座中張延秋
編修清華南海之雋今並論逝對此不勝黃壚
之感將軍大樹遂蕭瑟海南明珠幽恨滋豈惟乖
散成悽惋彈指流光暗中換不緣接席共心知
多恐憑欄獨腸斷腸斷何人歌采蓮雨餘柳色
青絲絲風光十以作香海水氣四壁疑疏煙最
難佳景置眼前且復小飲相留連浮雲萬事休
重問君不見祇有好花如昔年

同年陳竹香檢討招同諸公泛舟南河

小飲王氏園林五首

退思遺

三

遠聞碧雲寺

時擬為西
山之游

近見寶泉河高樹風疑

雨扁舟水欲波道遙吾意得放浪客懷多小構

窺林屋蒼蒼帶薜蘿

幽徑多芳草疏林影雜花晴畦庾信萊風土邵

平瓜溪網魚能得門羅雀可遮吾生樂泉石即

此是煙霞

灑落談詩塵徜徉漉酒巾羹調魚粥美泉品雀

茶新勝日淹車轄清風見釣綸蒲荷與菱芡綠

盡水鱗鱗

民物先朝盛經營此地偏猶聞林麓守不惜水

退思軒詩集

衡錢壞瓦餘今日荒亭委暮煙祇應明月影如
照太平年

未解文園渴來陪伯玉遊壺觴成勝迹巾扇得
名流約待尋三徑吟同丈八溝無為發騷怨感
事賦離憂

秋夜

綠槐孤館坐秋深翠篠疏簾逼夜沈樺燭脩書

溫半臂

時有總纂
會典之役

金釵沽酒感同心夢魂南國

誰家壘涕淚西風別院碁百歲已虛偕隱約離

絃終古冷瑤琴

退思遺

四

題南安太守周君瀚如

浩

庾嶺補梅圖

二首

大庾梅花國龍盤九磴高曲江開石峻橫浦置

關牢

關以梅鎬著稱亦曰橫浦關在大
庾嶺上宋管銳多植梅以實其名

古樹寒

香盡幽人不可遭荒荒舊官驛風雪冷亭皋

政成賢太守韻事補花來落月師雄夢流風管

銳才遠聞東閣詠不見北枝開安得從君後幽

探日幾回

陸鳳石同年屬題某君春谿晚渡圖

谿光罨畫春流碧花氣滿谿春寂寂中有幽人

三七九

自往來蒼苔徑破花閒屐曉風吹晴谿上煙曰
歸曰歸渡口船歸來詩思杳何處白雲洞壑春
谿邊十年一圖圖繪好鳳石言君六十時繪圖
曰載酒乞詩今復為此
圖以自壽也七十老翁翁不老世上雞蟲齊得失山
中猿雀都馴擾幾輩能同畫裏身悠悠鐘漏驚
行人春谿儻是桃源路便擬相從一問津

題張樵野侍郎奉使圖

君家博望侯壯氣壓橫流南極最高處西過天
盡頭三年龍虎節九譯鳳麟洲不有匡時略那
紆

退思遺

五

聖主憂

絕域輶軒地風雲浩蕩開胸羅萬象在手御二
龍來圖擬陳王會人誰及使才丹青事千古攬
卷一低徊

送游子岱方伯之官廣東

去年萬里橋邊別楊柳絲絲綠化煙今日相逢
燕市酒春風同醉虎坊筵循良天下如公少老
宿湘南牧伯賢何限蒼生待霖雨雄藩來障海
東天

寄贈曹永昌六首

聖主憂邊郡欽哉命此行股肱楚季布形勢漢
昆明關塞八千里風雲滿去程看君揮五馬攬
轡志澄清

莊蹻開滇國王褒祀益州山川多勝迹冠蓋幾
名流霜肅屯兵壘雲荒寫韻樓武功與文事今
古一綢繆

別路離人夢沈憂壯士肝春風折楊柳片月度
苴蘭夷校窺邊亟時危作吏難乾坤敝征繕何
以撫凋殘

聞道哀牢域能回徼外春邊才資鼓舞廢疾起

退思遺

六

因循地軸橫南詔天樞拱北辰循良期報最吏
道重儒臣

近侍蒙

恩舊危時茹恨多天寒紛霰雪日下見江河憤
切匡衡疏閒同曼倩歌別來應不忘朝散九門
珂

燕市尊前酒遙心憶送君鳳池花畔路回首惜
離羣城闕方秋色河山易夕曛蠻雲臺不見迢
遞隔南雲

陳竹香同年屬題玉堂補竹圖即以贈

別

雕闌隱映碧參差手種琅玕玉幾枝記取五雲
多處立一天風雪歲寒時

排雲直幹影脩脩美蔭當年五鳳樓願筆四彝
成不朽宋劉子翬此君傳時方多難何不
掃氛侵筆四彝以成不朽之名數莖

垂海六鼇愁唐陳陶詩
竹詩句

宦遊試攬西湖勝兵事休論

北闕書初議戰時君
嘗脩上兵事到日憑君問消息蘭亭脩
竹近何如

感事抒懷詩八首送同年陳竹香太守

退思遺

之官浙江

七

霰雪凋花柳神州氣不春兵戈無好夢冠蓋有
斯人並世論交舊同朝惜別新艱難家國淚揮
手一沾巾

夙昔飛騰意臨風俯八荒百年心許與萬事感
蒼茫浮宦身如葉憂時鬢有霜祗應馳怒馬一
箭取黃顰

元龍湖海士金馬翰林司高詠花千樹深談酒
一卮交親吾與汝風義友兼師不盡平生意青
松白石知

忽忽忘歡會依依到遠離驚心唐社稷滿眼漢
旌旗渡險懸番舶佳兵憤島夷海雲驕不落東
望永獻歎

四海勤王日風雲鬱壯圖長城無道濟邊郡陷
匈奴抗疏心徒切論兵膽欲麤誰能蛟蜃窟爲
取虎狼都

潰師唐節度禦寇威將軍失法應終悔能兵但
昔聞

廟謨違指授廷議慨紛紜坐使和戎策因收上
相勲

退思遺

八

漢庭書不報行矣賈長沙東海填無石西湖到
有花懷人春水闊弔古夕陽斜南渡朝廷小登
臨莫歎嗟

豪俊爲時出多君著祖鞭龔黃前史在蘇白古
人賢二浙龍飛地孤山鶴語天遙應別後夢日
向帝城邊

續感事抒懷詩八首送張劭予同年歸

觀河南

世難倏如此臨歧無奈何心肝憂國碎涕淚共
君多白日傾葵藿青山冷薜蘿曰歸歸便好吾

意愧蹉跎

故里遄還日高堂健在年恩寬辭闕疏計拙買山錢雷雨龍雙劍風沙馬一鞭征裝戒徒御知子意蕭然

今昔論豪傑光黃多異人莫輕千古事虛廢百年身蒿目當危局批鱗到小臣九關森虎豹未負膽輪囷

尺寸吾王土全臺大海頭傷心淪異域斷臂弱神州失策和戎日庸臣誤國秋河山無意緒風雨暮蕭颼

退思遺

九

四海蒼生淚春來冷欲冰早聞空杼柚何以款金繒利盡民膏血才窮帝股肱吞聲向穹昊悲憤鬱填膺

外患時方亟中華事可知臨朝聞痛哭去闕戀宸慈天地愁中色關河別後思幽棲傍神藪能採故山芝

祿養吾何及思親子獨歸鄉心滿嵩洛喜色動庭闈家國一心在乾坤百事非中原回首處猶傍五雲飛

迴駕張衡賦傷時鄭祭謠不禁離別感忍忘聖

明朝星履三天近風襟兩地遙重來定何日車馬路迢迢

驂鸞

驂鸞自何年祠宇猶空山春雨洗丹竈秋星炯瑤壇窈窕帝子靈月影時姍姍煙岫暈螺黛風泉鳴珮環仙境悶巖阿神光日燭爛荒碑字明滅遺蹟蕭梁間縹緲散花天凡骨無由攀空階草色晚邃殿松陰寒不見蓬萊宮但見飛鳥還誰能測元邈靈妙傾人寰

和時百廣水驛詩原韻

退思遺

十

夢懸丹闕賦西征驛路寒沙踏曉晴天寶詩懷戀行在漢廷恩遇憶承明雞聲促舞劉琨劍鴻業誰調傳說羹獨喜識時楊萬里豎儒羞作魯諸生

實甫以近作詩卷見眎賦此答之

壯氣縱橫辟萬夫河山立馬古西都腥臊天下非唐舊形勢關中此漢圖書上神宗王介甫詩推才子吉中孚八仙菴畔如澠酒澆盡人間磊塊無

難將皇極問堯夫無復兵威破骨都落日眼穿

行在句凌煙身忝侍臣圖豸冠坐覺慚桓典蠟
屐行當效阮孚故國樓臺何處是自嗤平地一
錐無

余薄宦廿年尚無定宅
家累旋里仍賃屋而居

日前以戊戌秋中所作詩送實甫審定

得復書題詩一首依韻答之

誰能鴻業調元象無復雄文賦反騷哀怨流風
同李杜安危今日付夔皋愁中擊楫波瀾壯夢
裏乘舟日月高賸欲與君謀貰酒相從一醉五
陵豪

綠柳

遲思遠

士

綠柳斜陽鵲樓碧荷寒露鳳麟洲似聞騎將
開戎幄不見雞人報曉籌禾黍故宮天北極柏
梁遺址地西頭金盤殘月銅仙淚泣盡寥風漢
苑秋

感事

荒荒白日愁來軫擾擾紅塵浣素襟秋水寒生
破劍匣晚風涼動擣衣砧中原詞客悲哀意小
雅詩人怨悻心欲向金臺訪時俊幽并豪氣已
銷沈

和樊山廉訪贈詩原韻

退思軒詩集

藝圃曾無一溉功虛名子野愧三中胸餘壯士
幽并氣心折名流鮑謝風騷衍才通九州外昌
黎文障百川東濟時不用愁衰白佳夢期占十
八公

原作

屈指中興蓋代功魁儒大半起湘中豈
期再造興元日猶見先朝正始風天以
尚書為北斗人言管子出江東津梁後
學無窮事姓氏連天有二公

公與少保
師同定學
堂章

遲思遠

士

附和作二首

原詩見
第四卷

朱一新

平生苦讀劉蕡傳災異虛陳中壘書郎
署一官容偃蹇罪言三策共歎歎鄉心
頓覺縈歸棹舊夢長應戀屬車聞道上
林游獵美肯將詞賦薄相如

黃國瑾

閒官不補時歲月逝如水醯雞聚一甕
盆魚日千里燕趙地易生悲歌事變況
勝浮雲多碧眼冠蓋塞道路牛罷驢蹇

愁奈何陸處誰發張融想萃我同懷浮
一舫桂棹蘭桡思湘君舟楫自備誦惜
往世閒濶濁何足云箕南斗北天之津
楚客發軔每自此眼中幸有嗽詞人君感
事具疏格不得上

退思軒詩集補遺

退思遺

十一